

亭林詩文集

冊二





亭林詩集卷之三

元日

疆圍作鹽

晨興自江上踰嶺走鍾山肅然至殿門雙扉護重  
關初日照宮闕隱映城郭閒空山寂無人獨來拜  
榛菅流轉雖不居咫尺猶天顏喜會牧馬收岡巒  
乍清閒歲序一更新陽風動人寰佇看龍虎氣得  
與春光還復想在宥初蒼生願重攀

杜子美詩武德開元際蒼生豈重攀

萊州

海右稱名郡齊東亦大都山形當斗入人質竝魁  
梧月主秦祠廢沙壇漢蹟孤已無巡狩蹕尚有戍  
軍郭漉海鹽千斛裁岡棗萬株蠶梁通日際蜃市  
接神區轉漕新河格分營絕島迂三方從廟算二

撫各兵符

天啓初議三方布置始設登萊巡撫

礮甲初傳造戈鋌已擊

屠中丞愁餌賊

謝璉

太守痛捐軀

朱萬年

郊壘青燐出

城陴白骨枯危情隨事往深慮逐年徂計士悲疵

國遺民想霸圖登臨多感慨莫笑一窮儒

史記封禪書成山斗入海 又曰八神六日月主祀之萊山 又曰天子乃禱萬里沙應劭曰萬里沙神祠也在東萊曲

成書大誥天降 威知我國有疵

安平君祠

在卽墨縣今廢

太息全齊霸業遺如君真是一男兒功成棧道迎

王日志決危城仗錘時飢鳥尚銜庭下粒老牛猶

飲穴邊池可憐王建降秦後千古無人解出奇

不其山

漢不其縣有康成書院今廢

荒山書院有人耕不記山名與縣名爲問黃巾滿

天下可能容得鄭康成

後漢書鄭玄傳自徐州還高密道遇黃巾  
賊數萬人見玄皆拜相約不敢入縣境

### 勞山歌

勞山拔地九千丈崔嵬勢壓齊之東下視大海出  
日月上接元氣包鴻濛幽巖祕洞難具狀煙霧合  
沓來千峰華樓獨收衆山景一一環立生姿容上  
有巨峰最巔劣數載榛莽無人蹤重厓複嶺行未  
極澗壑窈窕來相通天高日入不聞語悄然衆籟  
如秋冬奇花名藥絕凡境世人不識疑天工云是  
老子曾過此後有濟北黃石公至今號作神人宅  
憑高結構留仙宮吾聞東嶽泰山爲最大虞帝柴  
望秦皇封其東直走千餘里山形不絕連虛空自  
此一山奠海右截然世界稱域中以外島嶼不可  
計紛紛出沒多魚龍八神祠宇在其內往往棊置

生金銅古言齊國之富臨淄次卽墨何以滿目皆  
蒿蓬捕魚山之旁伐木山之中猶見山樵與村童  
春日會鼓聲逢逢此山之高過岱宗或者其讓雲  
雨功宣氣生物理則同旁薄萬古無終窮何時結  
屋依長松嘯歌山椒一老翁

說文山宣也宣  
氣散生萬物

張饒州允掄山中彈琴

趙公化去時一琴遺使君五年作太守卻反東臬  
耘有時意不愜來躡勞山雲臨風發宮商二氣相  
網緼可憐成連意空山無人聞我欲從君棲山厓  
與海濱

淮北大雨

秋水橫流下者巢踰淮百里卽荒郊已知舉世皆

行潦且復因人賦苦匏極浦雲垂翔溼雁深山雷  
動起潛蛟人生只是居家慣江海曾如水一坳

國語匏苦不材  
於人共濟而已

### 濟南

落日天邊見二峰平臨湖上出芙蓉西來水竇緣  
王屋南去山根接岱宗積氣蒼茫含斗宿餘波灑  
灑吐魚龍還思北海亭中客勝會良時不可逢  
水翳牆崩竹樹疏廿年重說陷城初荒涼王府餘  
山沼寥落軍營識舊墟百戰只今愁海岱一麾猶  
足定青徐經生老却成何事坐擁三冬萬卷書

### 賦得秋柳

昔日金枝間白花只今搖落向天涯條空不繫長  
征馬葉少難藏覓宿鴉老去桓公重出塞罷官陶

令乍歸家先皇玉座靈和殿淚灑西風夕日斜

南史宋武帝植蜀柳數株於靈和殿前  
唐李商隱詩腸斷靈和殿先皇玉座空

訓徐處士元善昔年新城之陷其母死焉故

有此作

桓臺風木正蕭辰傾蓋知心誼獨親季子已無觀

樂地偉元終是泣詩人愁看落日燕山夜畏見荒

江郢樹春來書勸為昌  
平承天之行踏徧天涯更回轡欲從吾友

卜東鄰

山東名勝志新城縣東有戲  
馬臺相傳齊桓公歇馬於此

登岱著雍  
闕茂

尼父道不行喟然念泰山空垂六經文不覩西周年七十二君代乃有封禪壇書傳多荒忽誰能信其然既嘗小天下復觀邃古前羲黃與堯舜蕩滅



同雲煙社首卑埒地徂徠高摩天下視大海旁神  
州自相連天地有變虧何人得升仙遺弓名烏號  
橋山葬衣冠末世久澆譌孰探幽明原三萬六千  
年山崩黃河乾立石既已刊封松既已殘太陽不  
東升長夜何漫漫哀哉一顏淵獨立瞻吳門疲精  
不肯休計畫無崖垠復有孟子輿眷眷明堂言庶  
幾大道還民質如初元上采黃金成下塞宣房湍  
何時一見之太息徒潺湲

易山附於地 史記封禪書樂大言臣之師曰黃金可成而河決可塞不死之藥可得仙人可致也

### 謁夫子廟

道統三王大功超二帝優斯文垂彖繫吾志在春  
秋車服先公制威儀弟子修宅聞絲竹響壁有簡  
編留俎豆傳千葉章逢被九州獨全兵火代不藉



廟堂謀老檜當庭發清洙繞墓流一來瞻闕里如  
得與從遊

杜子美宿鑿石浦詩斯  
文憂患餘聖哲垂彖繫

### 七十二弟子

亂國誰知爾孤生且辟人危情嘗過宋困志亦從  
陳籥舞虞庠夕弦歌闕里春門人惟季次未肯作  
家臣

一時同人多  
入官長幕

史記仲尼弟子傳公皙哀字季次孔子曰天  
下無道多為家臣仕於都惟季次未嘗仕

### 謁周公廟

道化千年後明禋一國中禮猶先世守制比百王  
崇配食唯元子烝嘗徧列公祠田還割魯氏系獨  
傳東有祭田碑言周公之  
後東野氏今為東姓舊史書茅闕新詩采闕宮巋  
然遺殿在不與漢侯同

謁孟子廟

古殿依邾邑高山近孔林游從齊魏老功續禹周  
深孝弟先王業耕桑海內心期應過七百運豈  
當今辯說千秋奉精靈故國歆四基岡上柏凝望  
轉蕭森

大明一統志四基山在鄒縣東北三十里  
山頂四石狀類臺基其西麓卽孟子墓

鄒平張公子萬斛園上小集各賦一物得桔  
槩

鑿木前人制收泉易卦稱天機無害道人巧合成  
能壤脈涓涓出川流搢搢升入晴常作雨當暑欲  
生冰菜甲青剪地花容赤繞塍彌令幽興劇頓使  
化工增坐愛平畦廣行憐曲水澄灌園今莫笑此  
地近於陵

莊子鑿木爲機後重前輕挈水若抽數如洪  
湯其名爲櫟 易井收勿幕 又曰震爲專

張隱君元明於園中寘一小石龕曰仙隱祠

徵詩紀之

白日浮雲隔幾重三山五嶽漫相逢  
竭來未得從黃石老至先思伴赤松  
哲士有懷多述酒英流無事且明農  
猶憐末俗愚難寤故作幽龕小座供  
百尺松陰十畝園此中人物似桃源  
衣冠俎豆猶三代雞犬桑麻自一村  
垣外白榆隨宿列樹頭青鳥候風翻  
坐來髣髴疑仙境試問先生笑不言

濟南

湖上荷花歲歲新客中時序自傷神  
名泉出地環巖郭急雨連山淨  
火旻絕代詩題傳子美近朝文字  
數于鱗愁來獨憶辛忠敏老淚無端  
痛古人

自笑

自笑今年未得歸酒尊詩卷欲何依呼僮向曉牽  
長轡覓嫗先冬綻故衣黃耳不來江表信白頭終  
念故山薇無因化作隨陽雁一逐西風笠澤飛

訓歸祚明戴笠王仍潘檉章四子韭溪草堂  
聯句見懷二十韻

異地逢冬節同人會韭溪蒼涼悲一別廓落想孤  
棲刻燭初分韻抽毫亦共題雪裝吳苑白雲幕越  
山低清醕傳杯緩哀弦入坐淒詞堪爭日月氣欲  
吐虹霓寫恨工蘇李攄幽劇呂嵇風流知不墜肝  
膽幸無睽挂帙安牛角擔囊逐馬蹏飄飄過東楚  
浩蕩適三齊息足雩門下停車汶水西岱宗臨日  
觀梁父躡雲梯洞壑來仍異關河去更迷人看秋

逝雁客喚早行雞臥冷王章被窮餘范叔緜夢猶  
經冢宅愁不到中閨來詩有親朋愁帶甲家舍祝添丁之句問字誰供酒  
繙書獨照藜雅言開竹徑佳訊發蘭畦遺鯉情偏  
切班荆意各悽式微君莫賦春雨正塗泥

濰縣

人臣遇變時亡或愈於死夏祚方中微靡奔一人  
爾二斟有遺蹟當日兵所起世人不達權但拜孤

山祀

孤山在昌樂縣東  
十里有伯夷廟

左傳昭二十年  
亡愈於死先諸

我行適東方將尋孔北海此地有遺風其人已千  
載英名動劉備一為却管亥後此復何人崎嶇但  
荒壘

衡王府

賜履因齊國分枝自憲宗能言皆詔予廣斥盡疏  
封地號東秦古王稱叔父恭穿池通海氣起榭出  
林容嶽里生秋草牛山見夕烽蛇遊宮內道鳥啄  
殿前松失國非奔莒亡王不住共雍門今有歎流  
涕一相逢

史記齊悼惠王世家諸民能齊言者皆予齊王晉書五行志  
臨淄有大蛇長十餘丈負一小蛇入城北門徑從市入漢城陽  
而齊王罔敗

### 督亢

此地猶天府當年竟入秦燕丹不可作千載自悽  
神野燒村中夕枯桑壠上春一歸屯占後墟里少  
遺民

### 京師作

煌煌古燕京金元遞開剏初興靖難師遂駐時巡



仗制掩漢唐閔德儷商周王魏弑大明門如翬峙  
南向其陽肇園丘列聖凝靈貺其內廓乾清至尊  
儼旒纒繚以皇城垣靚深擬天上其旁列兩街省  
寺鬱相望經營本睿裁斲削命般匠鼎從郊鄩卜  
宅是成周相穹然對兩京自古無與抗艷宮遜顯  
敞未央失宏壯西來太行條連天矚崖嶂東盡巫  
閩支界海看滉瀆居中守在支臨秋國爲防人物  
並浩穰風流餘慨忼百貨集廣馘九金歸府藏通  
州船萬艘便門車千兩絲延祀四六三靈哀板蕩  
紫塞吟悲笳黃圖布氈帳獄囚圻父臣王洽郊死凶  
門將桂滿悲號煤山縊泣血思陵葬先皇帝陵今號思陵宗子洎  
羣臣鳶岑與黔漲丁年抱國恥未獲居一障垂老  
入都門有願無絲償足穿貧士履首戴狂生盜愁



同箕子過粹比湘纍放縱橫數遺事太息觀今曩  
空懷赤伏書虛想雲臺仗不覩舊官儀惇惇念安  
傍復思塞上游汗漫誠何當河西訪竇融上谷尋  
耿況聊爲舊京辭投豪一吁悵

史記李廣傳以臨右北平盛秋滑稽傳東郭先生久待詔公車貧困飢寒衣敝履不完行雪中履有上無下足盡踐地後漢書逢萌傳首戴瓦盎突於市曰新乎新乎

### 薊州

北上漁陽道陰風倍慘悽窮魚浮淀白孽鳥向林  
低故壘餘安史居人半霰奚停驂聊一問幾日到  
遼西

戰國策雁從東方來更羸以虛發而下之曰此孽鳥也注孽者謂隱痛於身如孽子也舊唐書北狄傳奚國在京師東北四千餘里東接契丹西至突厥南拒白狼河北至霰國

### 玉田道中

我行至北方所見皆一概豈有田子春尚守盧龍  
塞驅車且東之英風宛然在山中無父老故宅恐  
荒蕤溼水久還流薊州志溼水在豐潤縣西門外凡水東流而此獨西故名曰還鄉河盤山  
仍面內地道無虧崩天行有蒙昧騁目一遐觀浩  
然發深愾可憐壯遊人不遇熙明代

永平

流落天涯意自如孤蹤終與世情疏馮驩原不曾  
彈鋏關令安能强著書榆塞晚花重發後灤河秋  
雁獨飛初從茲一覽神州去萬里徜徉興有餘

謁夷齊廟

言登孤竹山愾焉思古聖荒祠寄山椒過者生恭  
敬百里亦足君未肯滑吾性遜國全天倫遠行辟  
虐政甘餓首陽岑不忍臣二姓可為百世師風操

一何勁悲哉尼父窮每歷邦君聘楚狂歌鳳衰荷  
蕢譏擊磬自非爲斯人栖栖無乃佞我亦客諸侯  
猶須善辭命終懷耿介心不踐脂韋徑庶幾保平  
生可以垂神聽

寄弟紆及友人江南

屠維大淵獻

仲尼一旅人栖栖去齊衛當其在陳時亦設先人  
祭深哉告孟言緬矣封防制而我亦何爲遠遊及  
三歲前年北踰文頃者東過薊三世但一身南瞻  
每揮涕未敢廢烝嘗無由辦羊彘粟從仁者求酒  
向鄰家蕢庶幾儻來歆精靈眇天際不知自茲往  
吾駕焉所稅世故多屯遭日歸未成計疚如切中  
心沒齒安疏糲

家語孔子居於陳蔡七日不食子貢以所齎貨竊犯圍而出告  
糴於野人得米一石焉顏回仲由炊之子召顏回曰疇昔子夢

見先人豈或啓佑我哉子炊而進飯吾將祭焉  
北史王慧龍傳自慧龍入國三世一身至瓊始有四子  
詩疾如疾首

吾家有賜塋近在尚書浦前區百畝田後啓重門  
堵子姓儼成行科名多接武家風萬石傳花竹平  
泉圃蟬聯二百祀魂魄猶茲土一旦閱滄桑他人  
代爲主痛我遊子身中年遭薄祜驅車去關河行  
行遠豺虎親朋不可見何況予同父碌碌想阿奴  
耕田故辛苦行者歎四方居者愁門戶豈爲別離  
哀努力念爾祖

陸士衡贈從兄車騎詩營  
魂懷茲土精爽若飛沈

自昔遘難初城邑遭屠割幾同趙卒阬獨此一人  
活既偷須臾生詎敢辭播越十年四五遷今復客  
天末田園已侵并書卷亦剽奪尚虞陷微文雉羅  
不自脫却喜對山川壯懷稍開豁秉心在忠信持

身類迂闊朋友多相憐此志貫窮達雖鄰河北居  
未肯求响沫出國每徒行花時猶衣褐以此報知  
交無爲久惻怛

山海關

芒芒碣石東此關自天作粵惟中山王經營始開  
拓東支限重門幽州截垠堞前海彌浩漭後嶺橫  
岸嶸紫塞爲周垣蒼山爲鎖鑰緬想開剏初設險  
制東索中葉狂康娛小有干王略撫順矢初穿廣  
寧旗已落抱頭化貞逃束手廷弼却駸駸河以西  
千里屯氈幕關外修八城指麾煩內閣孫承宗楊公  
昌築二翼東西立羅郭時稱節鎮雄頗折氛侵惡  
神京旣顛隕國勢靡所託啓關元帥降敵血名王  
諾自此來域中土崩無鬪格海燕春乳樓塞鷹曉



飛泊宗社竟為灰六州難鑄錯

通鑑羅紹威召朱全忠盡殺魏博牙軍雖去其偏而魏兵自是衰弱紹威悔之曰合六州四十三縣鐵不能為此錯也注錯鑄也又誤也羅以殺牙軍之誤取鑄錯為喻

### 望夫石

威遠臺前春草萋望夫岡畔夜烏嘯九枝白日扶桑上萬疊蒼山大海西國是祇憑三寸舌老謀終惜一九泥愁心欲共秦貞女目斷天涯路轉迷

山海經陽谷上有扶桑十曰所浴居水中有大木九曰居下枝一日居上枝新序楚莊王問於孫叔敖曰寡人未得所以為國是也孫叔敖曰國之有是眾非之所惡也臣恐王之不能定也晉語卻叔虎曰既無老謀而又無壯事何以事君

### 昌黎

彈丸餘小邑固守作東藩列郡誰能比雄關賴此存霜槎春砦出風葉夜旗翻欲問嬰城事聲吞不敢言

三屯營

三屯山勢鬱崢嶸少保當年此建旌名似北平臨  
宿將制如河上築降城忠祠日落來山鬼武庫苔  
封蝕禁兵三忠祠在城南山上城西小門內有神器庫一望幽燕人物盡頽  
垣荒草不勝情

恭謁天壽山十三陵

成祖昔定都乃省茲山陽羣山自天來勢若蛟龍  
翔東趾據盧龍西脊馳太行後尻坐黃花前面臨  
神京中有萬年宅名曰康家莊可容百萬人豁然  
開明堂維時將作臣奉旨趨傍傍盛德比霸杜宏  
規軼瀝邛雷電驅玄冥白雲升帝鄉三光墜榆木  
窮北回輶輶駛馘金粟堆寂寞橋山藏右獻左次  
景裕茂迤西旁泰陵在茂西稍折南維康永陵在



東南規模特恢張  
硯石爲玄墀丹青煥  
雕梁昭近九龍池  
定依昭左方其制亦如永  
工麗踰孝長慶居獻西隅  
德奠永東岡環山數十里  
松柏參天蒼列宗每駕朝  
百職恆趨蹌一年祭三舉  
侍從來班楊詩追安世  
歌典與郊禘光自傷下土  
臣不覩昭代章天禍降宗  
國滅我聖哲王渴葬池水  
南靈宮迫妃傷上無寶城  
制周帀唯甄牆下有中涓  
墳陪葬義所當殿上立三  
主竝列田娘娘問此何代  
禮哽咽不可詳麥飯提一  
簞棗榛提一筐村酒與山  
蔬一一自攜將下階拜稽  
首出涕雙浪浪主祭非  
曾孫降假非宗祊重上諸  
陵間徘徊復彷徨茂陵樹  
千株獨立不受戕門闔尙  
完具上頭安御牀自康以  
接慶小樹多榆枋殿樓盡  
黃瓦逶迤各相望

康昭二明樓竝遭劫火亡定陵毀大殿以及東西  
廊餘陵半無門累甃仍支采尙存宰牲亭暨外諸  
監房石人十有二袍笏兼戎裝六獸柱則四制與  
鍾山亢跨以七孔橋峙以白石坊仁宗所製碑皆  
峯當中央行宮已積壤御路徒荒涼每陵二太監  
猶自稱司香人給地數畝把耒耕山場春秋祭碑  
下共用一豕羊皆云牧騎來斫伐尤披猖并力與  
之爭僅得保界疆有盜貴妃冢斬首竿以槍於時  
姦宄民瞿然始懲創繞陵凡六口六口各有兵一  
陵立一衛衛設屯與倉居庸有總兵昌平有侍郎  
一朝盡散迸無復陵京防燕山自義裁沙河自湯  
湯皇天自高高后土自芒芒下痛萬赤子上呼十  
三皇哭帝帝不聞籲天天無常幽都蹲 伯九關

飛虎俵日月相蝕虧列宿為參商自古有殂落劇  
哉哀姚黃從臣去鼎湖二妃沈江湘蒼黃一抔土  
十五零秋霜天心未可億人心未可量仲華謁西  
京崔損修中唐誰能寄此詩雅頌同洋洋

楊雄甘泉賦崇邱陵之駁駭今師古注曰高大之狀  
如子虛賦硬石砥注張揖曰硬石白者如冰半有赤色  
公

羊傳不及時而曰渴葬也注喻急也釋名日月未滿而葬曰渴  
唐書德宗紀貞元十四年以左諫議大夫平章事崔損為修

奉入陵使先是昭陵寢殿為火所焚至是獻昭乾定泰五陵各  
造屋三百七十八間橋陵一百四十間元陵三十間惟建陵仍

舊但修葺而已陵寢中牀褥帷幄一事以  
上帝皆親自閱視然後授損送於陵所

### 王太監墓

先帝賓天日諸臣孰扈從中涓能一死大節獨從  
容地切山陵悶魂扶御輦恭遠同高力士陪葬哭  
玄宗

唐書高力士傳高力士配流黔中赦歸至朗州聞上皇厭代北  
望號慟嘔血而卒代宗以其耆宿保護先朝贈揚州大都督陪

葬泰陵

劉諫議祠

在昌平舊縣今廢

阜囊青史漫傳名  
白日黃泉氣未平  
自古國亡緣宦者  
可憐身沒尚書生  
荒阡草長妖狐出  
舊驛風流劣馬行  
一自德陵升馭後  
山河祠廟總淪傾

居庸關

居庸突兀倚青天  
一澗泉流鳥道懸  
終古戍兵煩下口  
先朝陵寢託雄邊  
車穿褊峽鳴禽裏  
烽點重岡落雁前  
燕代經過多感慨  
不關遊子思風煙

魏書常景傳都督元譚據居庸下口亦作夏口北齊書文宣紀築長城自幽州北夏口至恆州九百餘里即今之南口也水

經注居庸關山岫層深側道褊峽林鄣據險路才容軌曉禽莫獸寒鳴相和羈官游子聆之者莫不傷思矣

極目危巒望八荒  
浮雲夕日徧山黃  
全收朔地當年大  
不斷秦城自古長  
北狩千官隨土木  
西來羣

盜失金湯空山向晚城先閉寥落居人畏虎狼

陳江總作魯廣達墓銘曰災流淮海險失金湯

重登靈巖在長清縣東南九十里

重來絕巘一攀緣壞閣崔嵬起莫煙山靜鮭獠棲

佛地堂空龍象散諸天芟林果熟紅椒後入定僧

歸白鶴前寺有雙鶴泉莫問江南身世事殘金兵火一

淒然寺自宋以來最盛金末侯摯屯兵張汝楫據守而寺為墟矣

### 秋雨

生無一錐土常有四海心流轉三數年不得歸園

林蹠地每塗淖闖天久曠陰尚冀異州賢山川恣

搜尋秋雨合淮泗一望無高深眼中隔泰山斧柯

未能任車沒斷崖底路轉崇岡岑客子何所之停

驂且長吟夷父念西渴精衛憐東沈何以解吾懷



嗣宗有遺音

後漢書梁鴻傳冀異州兮尚賢 孔子龜山操  
予欲望魯兮龜山蔽之手無斧柯奈龜山何

與江南諸子別

絕塞飄零苦著書  
竭來行李問何如  
雲生岱北天多雨  
水決淮壩地上魚  
濁酒不忘千載上  
荒雞猶唱二更餘  
諸公莫效王尼歎  
隨處容身足草廬

杜子美簡王明府詩行李須相問 史記秦始皇八年河魚大  
上漢書五行志魚逆流而上也 北史劉豐傳王思政據長社

民謠言大魚道上行豐建水攻之策渴涌水灌城水長魚鱉皆  
遊焉城遂陷 管輅別傳雞一二更鳴者為荒雞 晉書王尼

傳尼早喪婦有一子無居宅惟畜露車有牛一頭每行輒  
使御之莫則共宿車上嘗數日滄海橫流處處不安也

天津

文皇都北平始建天津衛  
內以輔神京外徹溟海  
際南北瀉兩河吐納百川  
細輓漕日夜來貢賦無  
留滯重臣鎮其間鼎足  
分宣薊豈惟念輸將隱然

存大計蠶盜踵巢芝共主非幽厲曾無一矢遺歟  
啓都城閉馬嵬止玄宗曹陽宿獻帝雖云兩日程  
乘輿豈能詣先帝一出宮洞然知國勢與其蹈危  
塗不若宮中縊於虜事一乖宇宙遂顛蹶開府固  
庸才奉頭竟南逝巡撫馮元颺侈言曲突謀縱有亦奚  
濟何人爲史官直筆埽蕪翳登陴望九門臨風灑  
哀涕

舊滄洲

落日空城內停驂問路歧曾經看百戰惟有一狡  
狎

再謁天壽山陵上章困敦

諸陵何崔嵬不改蒼然色下蟠厚地深上峻青天  
極佳氣鬱蔥蔥靈長詎可測云何月遊路坐見塞



塵偏空勞牲醴陳微寘神仙食仁言人所欣甘言  
人所惑小修此陵園大哉我邦國竭來惟仲春再  
拜翦荆棘臣子分則同駿奔誰共職區區犬馬心  
媿乏匡扶力

送王文學麗正歸新安

兩年相遇都門道只有王生是故人原廟松楸頻  
眺望夾城花萼屢經巡悲歌絕塞將歸客學劍空  
山未老身生舊在金侍  
郎聲幕府貫得一杯燕市酒傾來和淚  
溼車輪

答徐甥乾學

轉蓬枯質自來輕繞樹孤棲尙未成守兔江湄遲  
夜月飲牛澗底觸秋聲孤單苦憶難兄弟薄劣煩  
呼似舅甥今日燕臺何邂逅數年心事一班荆

鮑照擬古詩南國有儒生迷方獨  
淪誤伐木清江湄設置守龔免

# 白下

白下西風落葉侵重來此地一登臨  
清笳皓月秋依壘野燒寒星夜出林  
萬古河山應有主頻年戈甲苦相尋  
從教一掬新亭淚江水平添十丈深

# 重謁孝陵

舊識中官及老僧相看多怪往來曾  
問君何事三千里春謁長陵秋孝陵

# 贈林處士古度

老者人所敬於今乃賤之臨財但苟得  
不復知廉維五官既不全造請無虛時  
趙孟語諄諄煩亂不可治期頤悲緒淵  
毫齒嗟蘇威以此住人間動輒爲世嗤  
疑疑林先生自小工文辭彬彬萬厯中名

碩相因依高會白下亭卜築清溪湄同心遊岱宗  
誼友從湘纍江山忽改色草木皆枯萎受命松柏  
獨不改青青姿今年八十一小字書新詩方正既  
無訕聰明矧未衰吾聞王者興巡狩名山來百年  
且就見況德爲人師唯此耆成人皇天所憇遺以  
洗多壽辱以作邦家基

漢書東方朔傳老者人所敬也南史褚淵傳齊受禪拜司徒賓客滿坐其兄炤歎曰彥回少立名行何意披猖至此門戶不

幸復有今日之拜使彥回作中書郎而死不當是一名士邪名德不昌乃復有期頤之壽隋書蘇威傳大唐秦王平王充坐

於東都閭闔門內威請謁見稱老病不能拜起王遣人數之曰公隋朝宰輔政亂不能匡救遂令品物塗炭君弑國亡見李密

王充皆拜伏舞蹈今既老病無勞相見也尋歸長安至朝堂請見又不許卒於家年八十八莊子受命於地惟松柏獨也冬

夏青青書康誥汝不遠惟商耆成人莊子多壽則多辱

### 贈黃職方師正

建陽人

黃君濟川才大器晚成就一出事君王牧馬踰嶺

岫元臣舉國降羽葆蒙塵狩崎嶇遂奔亡空山侶  
猿狖蕭然冶城側窮巷一廛僦數口費經營索飯  
兼穉幼清操獨介然片言便拂袖常思驅五丁一  
起天柱仆微誠抱區區時命乃大謬南望建陽山  
荒阡餘石獸生違鹿柴居死欠狐邱首矢口爲詩  
文吐言每奇秀揚州九月中煨芋試新酎猛志雷  
破山劇談河放溜否終當自傾佇待名賢救落落  
公等存一繩維宇宙

杭州

重光赤  
奮若

宋世都臨安江山已失據猶誇天目山龍翔而鳳  
翥重江險足憑百貨東南聚於此號行都六帝鑾  
輿駐西輸楚蜀資北擁淮海戍湖光映罨山色  
連宮樹兩國罷干戈君臣日遊豫襄樊一陷沒千

里無完固梵唄響殿庭番僧扣陵墓天運亦何常  
以此思其懼

浙西錢穀地不以封宗室南渡始僑藩懿親藉丞  
弼序非涿郡疏德則琅邪匹如何負展謀蒼皇止  
三日那肱召周軍北庭王衛律所以敵國人盡得  
我虛實青絲江上來朱邸城中出一代都人士盡  
屈旃裘膝誰爲斬逆臣一奮南史筆

北齊書高阿那肱傳後主還鄴侍衛逃散惟那肱及內官數十  
騎從行後主走度太行令那肱以數千人投濟州關仍遣覘候  
每奏云周軍未至且在青州集兵未須南行及周將尉遲迥至  
關肱遂降時人皆云肱表款周武必仰生致齊主故不速報兵  
至使後主被檢肱至長安授大  
將軍封郡公爲隆州刺史誅

### 禹陵

大禹巡南守相傳此地崩禮同虞帝陟神契鼎湖  
升窆石形模古墟宮世代仍探奇疑是穴考典或



言陵玉帛千年會山河一氣憑御香來敕使主守  
付髡僧樹暗巖雲積苔深壑雨蒸鵲鷓呼豕柏蝠  
蝠下祠鐙餘烈猶於越分封竝祀鄮國詒明德昨  
人有霸圖稱往者三光墜江干一障乘投戈降北  
固授子守西與沖主常虛己謀臣動自矜普天皆  
爵祿無地使賢能合戰山回霧窮追海踐冰蠹城  
迷白草鏡沼爛紅菱樵采岡林徧弓刀隄壁增遺  
文留仆碣仄徑長荒藤望古頻搔首嗟今更撫膺  
會稽山色好悽惻獨攀登

史記越世家贊越世世為公侯蓋禹之餘烈也周語有夏雖  
衰祀鄞猶在左傳授師子焉以伐隨通鑑慕容皝攻慕容

仁時海凍慕容皝自昌黎東踐冰而進越絕書防陽者越所  
以逼吳軍也杭隄者句踐杭也二百石長員卒七士人度之會  
夷

宋六陵



六陵饒荆榛白日愁春雨山原互起伏井邑猶成  
聚偃折冬青枝哀哀叫杜宇海水再桑田江頭動  
金鼓躡屩一遷逡淚灑攢宮土

楚辭九章遷逡次而勿驅兮聊假日以須時洪  
興祖補注遷逡猶逡巡行不進貌逡七旬反

### 顏神山中見橘

黃苞綠葉似荆南立雪凌寒性自甘但得靈均長  
結伴顏神山下卽江潭

三月十九日有事於攢宮時聞緬國之報

攝提格

此日空階薦一觴軒臺雲氣久芒芒時來夏后還  
重祀識定凡君自未亡宿鳥乍歸陵樹穩春花初  
放果園香年年霑灑頻寒食咫尺龍髯近帝旁

莊子楚王與凡君坐少焉楚王左右曰凡亡者三凡君曰凡之  
亡也不足以喪吾存夫凡之亡不足以喪吾存則楚之存不足

以存存由是觀之則凡未始亡而楚  
未始存也 二輔黃圖安陵有果園

### 古北口

漢家亭障接山南光祿臺空倚夕嵐  
戍卒耕田烽火寂唯餘城下一茅庵

歲歲飛鴻出口迴年年采木下川來  
川中鹿角都除卻便似函關日夜開

白髮黃冠老道流自言家世小興州  
一從移向山南住吹角孤城二百秋

永樂初棄大小興州

霧靈山上雜花生山下流泉入塞聲  
卻恨不逢張少保磧南猶築受降城

霧靈山在曹家塞邊外嘉靖初巡撫王自用欲賂三衛取其山城之

不果

### 五十初度時在昌平

居然瀟灑落念無成隙視流萍度此  
生遠路不須愁

日莫老年終自望河清常隨黃鵠翔山影慣聽青  
驄別塞聲舉目陵京猶舊國可能鐘鼎一揚名

### 北嶽廟

曲陽古名邦今日稱下縣嶽祠在其中魏峩奉神  
殿體制匹岱宗經營自雍汴鶴駕下層霄宸香闕  
深院睽暘鬼目獰盤蹙松根轉白石睇穹文丹楹  
仰流絢肇典在有虞望秩羣神徧時巡歲卽莫歸  
格牲斯薦自此沿百王彬彬著紀傳恆山跨北極  
自古無封禪賴以鎮華戎帝王得南面河朔多疆  
梁燕雲屢征戰赫赫我陽庚區分入邦甸告祈無  
闕事降福蒙深眷周封喬嶽柔禹別高山奠疆吏  
少干城神州戎馬踐祠同宋社亡

時嶽祀移  
渾源州

祭卜伊

川變再拜出廟門臨風淚如霰

左太冲吳都賦忘其所以睽暘失其所以去就李善注說文曰  
睽覲視也暘疾視也舊唐書張嘉貞傳為定州刺史至州於  
恆嶽廟中立頌自為文書於石為碑用白石為之素質黑文甚  
為奇麗今碑在廟中漢書郊祀志周顯王之四十二年宋太

邱社  
亡

### 井陘

水折通燕海山盤上趙陘權謀存史冊險絕著圖  
經瞰下如臨井憑高似建瓴壑冰當路白窰火出  
林青頗憶三分國會觀九地形秦師踰上黨齊卒  
成熒庭獨此艱方軌於今尚固局井陘之道春秋戰國  
用兵未有由之者自  
王翦韓信伐趙始開此路而魏道武伐燕使公孫蘭于栗磳帥步  
騎二萬自太原開井陘關路襲燕慕容寶於中山至今遂為通塗  
連恆開晉索指昴偪虞星乞水投孤戍炊藜舍短  
亭卻愁時不會天地一流萍

左傳襄二十一年齊侯伐晉張武軍於熒庭戍鄆邵封少水以  
報平陰之役定四年命以唐誥而封於夏虛啓以夏政疆以

戎索

一雁

一雁度汾河河邊積雪多水枯清澗曲風落介山  
阿塞上愁書信人間畏網羅覆車方有粟飲啄意  
如何

堯廟

舊俗陶唐後嚴祠古道邊土階依玉座松棟冠平  
田霜露空林積丹青彩筆鮮垂裳追上理厯象想  
遺篇烏火頻推革山龍竟棄捐汾方風動壑姑射  
雪封顛典冊淪幽草文章散莫煙滔天非一族猶  
馬已三傳歲至澆邨酒人貧闕社錢相逢華髮老  
猶記漢朝年

符子堯曰余坐華殿之上森然而松生於棟余  
立櫺扉之內霏然而雲生於牖詩彼汾一方

亭林詩集卷之三

三  
 四  
 五  
 六  
 七  
 八  
 九  
 十  
 十一  
 十二  
 十三  
 十四  
 十五  
 十六  
 十七  
 十八  
 十九  
 二十  
 二十一  
 二十二  
 二十三  
 二十四  
 二十五  
 二十六  
 二十七  
 二十八  
 二十九  
 三十  
 三十一  
 三十二  
 三十三  
 三十四  
 三十五  
 三十六  
 三十七  
 三十八  
 三十九  
 四十  
 四十一  
 四十二  
 四十三  
 四十四  
 四十五  
 四十六  
 四十七  
 四十八  
 四十九  
 五十  
 五十一  
 五十二  
 五十三  
 五十四  
 五十五  
 五十六  
 五十七  
 五十八  
 五十九  
 六十  
 六十一  
 六十二  
 六十三  
 六十四  
 六十五  
 六十六  
 六十七  
 六十八  
 六十九  
 七十  
 七十一  
 七十二  
 七十三  
 七十四  
 七十五  
 七十六  
 七十七  
 七十八  
 七十九  
 八十  
 八十一  
 八十二  
 八十三  
 八十四  
 八十五  
 八十六  
 八十七  
 八十八  
 八十九  
 九十  
 九十一  
 九十二  
 九十三  
 九十四  
 九十五  
 九十六  
 九十七  
 九十八  
 九十九  
 一百



亭林詩集卷之四

元旦

昭陽單闕

平明遙指五雲看十九年來一寸丹  
合見文公還晉國應隨蘇武入  
長安驅除要淬新劔拜舞思  
彈舊賜冠更憶堯封千萬里  
普天今日望王官

莊子今臣之刀十九年矣所解  
數千牛矣而刀刃若新發於硎

霍山

霍山古帝畿崔嵬據汾左東環太行趨北負恆山  
坐幽泉迸雷出奇峯挾雲墮百物饒姿容名花獻  
千朵廟食當山阿重門奠磊砢象設猶古先冠裳  
蒙垢堞春雪覆松杉堂基對蓬穎主守各散亡空  
室無一鎖五鎮稱副嶽亦能降淫禍豈忘帝王朝  
時陟高山墮黍稷既非馨趨將况云惰神人一失

職庶事交叢脞有寺號興唐近在祠東埵昔日義  
旗來列宿紛旒旆更念七雄時晉卿特么麼茫然  
二節竹刻期兆猶果寶命何邇封四荒無不可再  
拜霍山神惟神實知我

舊唐書高祖紀師次靈石隋武牙郎將宋老生屯霍邑以拒義  
師會霖雨積旬餽運不給有白衣老父詣軍門曰余為霍山神  
使謁唐皇帝曰八月雨止路出霍邑東南吾當濟師高祖曰此  
神不欺趙毋卹豈負我哉八月辛巳高祖引師趨霍邑斬宋老  
生史記趙世家襄子奔晉陽原過從後至於王澤見三人自  
帶以上可見自帶以下不可見與原過竹二節莫通曰為吾以  
是遺趙毋卹原過既至以告襄子襄子齋三日親自剖竹有朱  
書曰趙毋卹余霍泰山山陽侯天使也三月丙戌余將使女反  
滅知氏女亦立我百邑余將賜女林胡之地襄子既并知氏遂  
祠三神於百邑使原過主霍泰山祠祀左傳昭九年吾何邇  
封之有爾雅觚竹北戶  
西王母日下謂之四荒

### 書女媧廟

吁嗟乎三代以後天傾西北不復補但見悲風淅  
淅吹終古日月星辰若綴旒赤黃青白交旁午北

極偏高南極低四時錯迕乖寒暑城淪洪水海成  
田六鼇簸蕩中流柱羲和益稷不任事畫州造厯  
迷堯禹彎弓不射九日落蒼蒼列象生毛羽仁人  
志士久鬱邑精衛空費西山土排天門盪地戶見  
天皇與天姥五色之石空煇爛道旁委棄無人取  
長人十二來臨洮苻姚劉石相雄豪天竺之書入  
中國三千弟子多其曹涼州龜茲奏宮廟漢魏雅  
樂隨波濤花門吐蕃日侵軼天子數出長安逃人  
似魚鰕隨水落世以東南爲大壑一半乾坤長草  
萊山南代北虛城郭百年舊蹟邈難記遺宮別寢  
屯狐貉至今趙城之東八里有廟尙崔嵬不見媧  
皇來制作里人言是古高禖萬世昏姻自此開華  
渚虹藏河馬去三皇五帝愁胚胎奇功異事不可

問汾邊山下餘蘆灰惟天生民無主乃亂必有聖  
人以續周漢如冬復如春日月如更旦剝復相乘  
除包犧肇爻象不見風陵之堆高突兀沒入河中  
尋復出天迴地轉無時歇

列子龍伯之國有大人一釣而連六鼈於是岱輿員嶠二山流  
於北極沈於大海 路史古高禘祀女媧 唐書五行志天寶

十二載號州閩鄉縣界黃河中女媧墓因大雨晦冥失其所在  
乾元元年六月一日夜河濱人家忽聞風雨聲曉見其墓涌出

上有雙柳樹下有巨石二柳  
各長丈餘今謂之風陵堆

### 晉王府

卜維方遷鼎封唐次翦珪國分河華北星主實沈  
西攘狄威名重垂昆敬德躋寵光延白屋惠澤普  
黔黎別殿俄傳燧深宮早聽鼙梯衝臨玉壁戈旂  
繞銅鞮井竭龍池水梁空燕壘泥圃花游鹿采山  
木化鶻嗥國語春秋志賢王暇日題

壁上大書楚語  
靈王為章華之

臺一定知慈儉理得與禹湯齊玉葉衣冠盡金刀

姓字迷那堪梁苑草春日更萋萋

張衡西京賦左暨河華唐六典玄宗所居隆慶坊宅之東有井忽湧為小池周袤十數丈常有雲氣或黃龍出其中至景龍

中潛復出水其沼寢廣里中人悉移居遂鴻洞為龍池

### 贈傅處士山

為問明王夢何時到傅巖臨風吹短笛  
鬪雪荷長鑱老去肱頻折愁深口自緘  
相逢江上客有淚溼青衫

### 又訓傅處士次韻

清切頻吹越石笳窮愁猶駕阮生車  
時當漢臘遺臣祭義激韓讎舊相家  
陵闕生哀回夕照河山垂淚發  
春花相將便是天涯侶不用虛乘犯斗槎  
愁聽關塞徧吹笳不見中原有戰車  
三戶已亡熊



繹國一成猶啓少康家蒼龍日莫還行雨老樹春  
深更著花待得漢庭明詔近五湖同覓釣魚槎

楚辭離騷及少  
康之未家兮

陸貢士來復

武進人

述昔年代許舍人曦草疏

攻鄭鄭事

維蜀交爭黨禍深宵人何意附東林然犀久荷先  
皇燭射隼能忘俠士心梅福佯狂名字改子山流  
落鬢毛侵愁來忽遇同方友相對支牀共越吟

庾信哀江南賦年  
始二毛卽逢喪亂

詠史

永嘉一蒙塵中原遂翻覆名孤石勒誅觸眇苻生  
戮哀哉周漢人離此干戈毒去去王子年獨向深  
巖宿



李克用墓在代州西八里

唐綱既不振國姓賜沙陀遂據晉陽宮表裏收山河朱温一篡弑發憤橫瑠戈雖報上源讎大義良不磨竟得埽京雒九廟仍登歌伶官隕莊宗愛壻亡從珂傳胙頗不長功名誠足多我來雁門郡遺冢高嵯峨寺中設王象緋袍熊皮鞞旁有黃衣人年少神磊砢想見三垂岡百年淚滂沱敵人亦太息如此孺子何千載賜姓人流汗難重過

五代史唐本紀存勳克用長子也初克用破孟方立於邢州還軍上黨置酒三垂岡伶人奏百年歌至於衰老之際聲辭甚悲坐上皆悽愴時存勳在側方五歲克用慨然捋鬚指而笑曰吾行老矣此奇兒也後二十年其能代我戰於此乎及克用卒存勳即王位梁人圍潞州王乃出兵趨上黨行至三垂岡歎曰此先王置酒處也會天大霧晝暝兵行霧中攻其夾城破之梁軍大敗凱旋告廟

### 五臺山

東臨真定北雲中盤薄幽并一氣通欲得寶符山上是不須參禮化人宮

訓李處士因篤

三晉阨河山登覽苦不暢我欲西之秦潛身睨霸王一朝得李生詞壇出飛將撝呵斗極迴含吐黃河漲上論周漢初規模迭開剏以及文章家流傳各宗匠道術病分門交游畏流宕朋黨據國中雌黃恣騰謗吾道貴大公片言折邪妄論事如造車欲決南轅向觀人如列鼎欲察神姦狀稍存俞咈詞不害于喁唱君無曲學阿我弗當仁讓更讀詩百篇陡覺神采壯游五臺山諸作先我入深巖嶽峯剖重嶂高披地絡文下挈竺乾藏大氣橐山川雄風被邊障泚筆作長歌臨歧爲余貺自哂同坎鼃難佐

北溟浪惟此區區懷頗亦師直諒竊聞關西士自  
昔多風尚豁達貫古今然諾堅足仗如君復幾人  
可愜平生望東還再見君牀頭倒春釀

雨中送申公子涵光

十載相逢汾一曲新詩歷落鳴寒玉懸甕山前百  
道泉臺駘祠下千章木登車衝雨馬頻嘶似惜連  
錢錦障泥并州城外無行客且共劉琨聽夜雞

訓史庶常可程

伊尹適有夏太公之朝歌吾儕亦此時將若蒼生  
何跨驢入長安七貴相經過不敢飾車馬資用防  
其多豈無取諸人量足如飲河顧視世間人夷清  
而惠和丈夫各有志不用相譏訶君今寓高都連  
山阻巍峨佳詩遠寄將建安激餘波想見蕭寺中

抱膝苦吟哦古人尚訓言亦期相切磋願君無受  
惠受惠難負荷願君無倦游倦游意蹉跎

書序伊尹去亳適夏既醜有夏復歸於亳  
平淮夷雅威命是荷音何注引左傳昭七年弗克負荷平聲按  
後漢書班超傳贊魏嵇康答二郭詩晉潘岳河陽縣作劉琨答盧諶詩並作平聲

### 汾州祭吳炎潘檉章二節士

露下空林百草殘臨風有慟奠椒蘭韭溪

二子所居

化幽泉碧蒿里魂歸白日寒一代文章亡左馬千

秋仁義在吳潘巫招虞殯俱零落欲訪遺書遠道

難

楚辭九辯白露既下百草兮奄離披此梧楸  
宋書孝義傳王韶之贈潘綜吳達詩仁義伊在惟吳惟潘心積純孝事著艱難  
投死如歸淑問若蘭左傳哀十一年公孫夏命其徒歌虞殯

### 寄潘節士之弟耒

筆削千年在英靈此日淪猶存太史弟莫作嗣書

人門戶終還汝男兒獨重身  
裁詩無寄處掩卷一傷神

王官谷

士有負盛名卒以虧大節咎在見事遲不能自引  
決所以貴知幾介石稱貞潔唐至昭宗時干戈滿  
天闕賢人雖發憤無計匡杌隍邈矣司空君保身  
類明哲墜笏雒陽墀歸來臥積雪視彼六臣流恥  
與冠裳列遺像在山厓清風動巖穴堂茆一畝深  
壁樹千尋絕不復見斯人有懷徒鬱切

蒲州西門外鐵牛唐時所造以繫浮橋者今  
河西徙十餘里矣

唐代浮梁處遺牛制尙新一朝移岸谷千載困風  
塵失水鼃鼃沒依城鸛雀鄰

舊有鸛雀樓在城西南黃河中高阜處時有鸛雀樓



其上遂名後為河流衝沒  
即城角樓名之以存其蹟  
應無丞相問儻與牧童親世

變形容老年深戰伐頻無窮懷古意舍爾適西秦

竹書紀年周穆王三十七年伐楚起師至於九江叱鼃鼃以為梁甯戚飯牛歌吾將舍爾相齊

### 潼關

黃河東來日西沒斬華作城高突兀關中尚可一  
丸封奉詔東征苦倉卒紫髯豈在青城山白骨未  
收殺澗間至今秦人到關哭淚隨河水無時還

陸游姚平仲傳欽宗即位金人入寇平仲請出死士斫營不利遂乘青驃亡命至青城山上清宮留一日復入大面山乃解縱所乘驃得石穴以居朝廷數下詔物色求之弗得也乾道淳熙間始出至丈人觀道院自言如此年八十餘紫髯鬱然長數尺

### 華山

四序乘金氣三峯壓大河巨靈雄鬣鬣白帝儼巍  
峨地劣窺天井雲深拜斗阿夕嵐開翠巘初月上



青柯欲摘星辰墮還虞虎豹訶正冠朝殿闔持杖  
叱羲和勢扼雙嶠壯功從駟伐多未歸桃塞馬終  
負魯陽戈山鬼知秦帝蠻王屬趙佗出關收楚魏  
浮水下江沱老尚思三輔愁仍續九歌唯應王景  
略歲晚一來過

華嶽志青柯坪西有峯插天名曰北斗坪蓋毛女拜斗得仙之地也楚辭招魂虎豹九關謝朓和王著作入公山詩二別

阻漢坻雙嶠望河澳水經注湖水出桃林塞之夸父山武王伐紂天下既定王及嶽濱放馬華陽散牛桃林卽此處也其中

多野馬史記淮陰侯傳漢二年出關收魏河南韓殷王皆降蘇代傳蜀地之甲乘船浮於汶乘夏水而下江五日而至郢

漢中之甲乘船出於巴乘夏水而下漢四日而至五渚晉書王猛隱於華陰山懷佐世之志希龍顏之主斂翼待時候風雲

而後動

### 驪山行

長安東去是驪山上有高臺下有泉前有幽王後  
秦始覆車在昔良難紀華清宮殿又何人至今流

恨池中水君不見天道幽且深  
敗亡未必皆荒淫  
亦有英君御區宇終日憂勤思  
下土賢妃助內詠  
雞鳴節儉躬行邁往古一朝大  
運合崩殯三宮九  
市橫豺虎玄宗西幸路仍迷宜  
白東遷事還沮我  
來驪山中哽咽四顧徬徨無可  
語傷今弔古懷坎  
軻嗚呼其奈驪山何

通鑑唐敬宗紀上欲幸驪山温湯左僕射李絳諫議大夫張仲  
方等屢諫不聽拾遺張權輿伏紫宸殿下叩頭諫曰昔周幽王  
幸驪山為大戎所殺秦始皇葬驪山國亡玄宗宮驪山而祿山  
亂先帝幸驪山享年不長上曰驪山若此之凶邪我宜一往以  
驗彼言

長安

東井應天文西京自炎漢都城北斗崇渭水銀河  
貫千門舊宮掖九市新廛閑雲生百子池風起飛  
廉觀呼韓拜殿前頡利俘橋畔武將把雕戈文人

弄柔翰遺蹟俱煙蕪名流亦星散愁聞赤眉入再  
聽漁陽亂論都念杜篤去國悲王粲積雨乍開塞  
淒其秋已半惆悵遠行人單衣裁至盱

史記秦始皇紀爲複道自阿房渡渭屬之咸陽以象天  
極閣道絕漢抵營室也後漢書杜篤傳上奏論都賦

### 乾陵

代運當中絕房幃召女戎誅鋤宗子盡羅織庶僚  
空典祏遷新主司筵埽故宮貞符疑改卜大禮竟  
升中復子仍明兩登遐獲令終彌縫由密勿迴幹  
賴元功祔廟尊親竝因山宅兆同至今尋史傳猶  
想狄梁公

周禮司几筵下十二人陸  
機漢高帝功臣頌三靈改卜

將去關中別中尉存杠於慈恩寺塔下

廓落悲王子棲遲愛友朋荒郊紆策馬獵徑傍鞫

鷹土室人稀到衡門客少鷹傾壺頻進酒散帙每  
挑鐙歎息當憂患仙人獨戰兢薄田遺豆麩童阜  
賸薪蒸疾病嗟年老虔恭尚夙興芋魁收蜀郡瓜  
種送東陵世業為奴有空名任盜憎幸餘忠厚福  
猶見子孫承渭水徂年赤岐山一夜崩低頭從竈  
養脫蹟溷林僧毒計哀阮趙淫刑虐用鄙忠魂依  
井植碧血到泉凝賊陷西安令弟存柁投井死困鬣時防罟驚禽

早避矰屢捫追駟舌莫運擊蛇肱謬忝師資敬尉中尉

子及甥皆執經於余多將氣誼憑深情占復始積德望高升子

建工詩早河間好學稱堂垣逾舊大國邑與前增  
九鼎知猶重三光信有徵沈埋隨劍璽變化待鯤  
鵬樹落龍池雪風懸雁塔冰更期他日會拄杖許

同登

易升大象地中生木君子以順德積小以高大  
謝靈運和伏武昌登孫權故城炎靈遺劍壘

后土祠

闕逢  
執徐

漢孝武所立后土祠在今滎河縣北十里  
地名鄴上或曰睢上史所云幸河東祠后  
土者蓋屢書焉其後宣元成三帝及唐宋  
二宗皆嘗親幸以及國朝雖不親祀典而  
歷代相傳宮殿之巍峨象設之莊靜香火  
之駢闐未嘗廢也歲闕逢執徐王正五日  
予至其下廟祝云距此十五年爲黃河所  
齧神宇圯焉乃徙象於東南二里坡下今  
所謂行宮者而古柏千章盡伐之以充改  
造之用廟未成而木盡矣是日大雪令祝  
引導策馬從之逶迤而登則坊門墀廡宛



然東有大寧宮亦存遺址惟正殿及秋風  
洗妝二樓皆已蕩然為斷崖絕壑而王文  
正旦之碑猶臥雪中不能洗而讀也愴然  
有感乃作是詩

漢書武帝紀元鼎四年十一月甲子立后土祠於汾陰  
隄上師古曰隄者以其形高起如人尻隄故以名云一  
說此臨汾水之上地本名鄴音與葵同彼鄉人呼  
葵音如誰故轉而為隄焉耳故漢舊儀云葵上

靈格移鄴上洪流圯故宮事同淪泗鼎時接墮天  
弓古木千章盡層樓百尺空地維疑遂絕皇鑒豈  
終窮髣髴神光下昭回治象通雄才應有作灑翰  
續秋風

龍門

互地黃河出開天此一門千秋憑大禹萬里下崑  
崙入廟焄蒿接臨流想象存無人書壁問倚馬日



將昏

王逸楚辭天問序仰見圖畫因書其壁呼而問之

自大同至西口四首

舊府荒城內積垣只四門先朝曾駐蹕當日是雄藩  
綵帛連樓滿笙歌接巷繁一逢三月火惟弔國殤魂

落日林胡夜南風盛樂春地當天北極山是國西鄰  
冠帶中原隔金繒異域親武靈遺策在猶可制秦人

宋白續通典唐振武軍漢定襄郡之盛樂也在陰山之陽黃河之北後魏所都盛樂是也在唐朔州北三百餘里 史記趙世家主父欲從雲中九原直南襲秦

駿骨來蕃種名茶出富陽年年天馬至歲歲酪奴忙  
蹴地秋雲白臨鑪早耐香和戎真利國烽火罷

邊防

禮記月令孟夏天子飲酎注酎之言醇也謂重釀之酒也楚辭大招四酎并孰

舊說豐州好於今號板升印鹽和菜滑桐乳入茶  
凝塞北思脣齒河東問股肱獨餘京洛叟終日戍

樓憑

舊唐書唐休璟傳超拜豐州司馬永淳中突厥圍豐州都督崔智辨戰歿朝議欲罷豐州徙百姓於靈夏休璟以為不可上書曰豐州控河邊賊實為襟帶自秦漢以來列為郡縣田疇良美尤宜耕牧隋季喪亂不能堅守乃遷徙百姓就寧慶二州致使戎羯交侵乃以靈夏為邊界貞觀之末始募人以實之西北一隅方得寧謐今若廢棄則河旁之地復為賊有靈夏等州人不安業非國家之利也朝廷從其言豐州復存唐書豐州九原郡貢印鹽漢書禮樂志給大官桐馬酒李奇曰以馬乳為酒撞桐乃成也

孟秋朔日有事於櫜宮

秋色上陵垆新松夾殿青草深留虎迹  
茂陵寶城內獲二虎山

合繞龍形放犢朝登壠司香月掃庭不辭行潦薦

髣髴近惟馨

贈孫徵君奇峯

海內人師少中原世運屯微言垂舊學懿德本先  
民早歲多良友同時盡諍臣蒼黃悲詔獄忼慨急

交親

天啓中左光斗魏大中周順昌三君  
被逮至京君爲周旋營救不辟禍患

黨錮時方解儒

林氣始申明廷來尺一空谷賁蒲輪未改幽棲志

聊存不辱身名高懸白日道大屈黃巾衛國容尼

父燕山住子春門人持笈滿郡守式廬頻竹柏心

彌勁陶鎔化益醇登年幾上壽樂道卽長貧尙有

傳經日非無拜老辰伏生終入漢綺里只辭秦自

媿材能劣深承意誼真惟應從卜築長與講堂鄰

訓程工部先貞

梅蒙大  
荒落

縣上耕山日青門灌圃時懷人初有歎裂素便成

辭一雁陵秋闊雙魚入水遲任城樓突兀大野澤  
 參差物象今來異天心此際疑風沙春氣亂彗孛  
 夜芒垂見魁當郊舞聞人叫廟謔頻翻坤軸動乍  
 鬪日輪虧水竭愁魚鱉山空困鹿麋傷心猶賦斂  
 舉目盡流連旅計真無奈朋歡可更追秋吟調鮑  
 照日飲對衰絲蚤急當軒響花繁繞砌枝朱弦彌  
 唱古白雪每誇奇劍術人誰學琴心爾共知三年  
 嗟契闊隻羽倦差池尚媿劬勞憶來詩云看君行邁劬勞甚還添  
 老大悲幾闕尼父室獨近董生帷相傳德州有董子讀書臺器忝  
 南金許文成繡段詒清風來彩筆疏韻落芳卮西  
 蜀玄方草東周夢未衰會須陪燕笑重和鄴中詩

淮南子麒麟鬪而日月食 宋鮑照有園中秋散詩 史記袁盎傳盎兄子種謂盎曰南方卑溼君能日飲毋苛

寄劉處士大來

柔北 敦祥

劉君東魯才頗能究經傳時方渾九流發憤焚筆

硯久客梁宋間落落無所見棄家走關中自結三

秦彥便居公瑾宅直上高堂宴館李子德家憶昨出門

初朔風灑冰霰獨身跨一驢力比蒼鷹健崎嶇上

太行彳亍甘重趼一過信陵君陳君上年下土色無倦

贈別寶刀裝賓僚陪祖餞麾楫渡蒲津駿馬如奔

電上下五陵間秦郊與周甸花殘御宿苑麥秀含

元殿常過韋杜家早識嚴徐面意氣何翩翩交游

良可羨回首憶故人久滯臨淄縣黃塵汚人衣數

舉西風扇山東不足居苦為相知勸世路況悠悠

窮愁儻能遣聊裁一幅書去託雙飛燕

晉韓延之復劉裕書假令天長喪亂九流渾濁世說庾公在石頭王公在冶城坐大風揚塵王以扇拂塵曰元規塵汚人

# 朱處士彝尊過余於太原東郊贈之



詞賦雕鐫老河山騁望頻末流彌宇宙大雅接斯  
人世業推王謝儒言纂孟荀書能搜五季字必準  
先秦攬轡長城下回車晉水濱秋風吹雁驚夜月  
臥麒麟玉盃人間有珠襦地上新吞聲同太息吮  
筆一酸辛盜發晉王墓得黃金數百斤與爾皆椎結於今且鈞緡  
羈心縈故蹟殊域送良辰草沒青驄晚霜浮白墮  
春自來賢士達往往在風塵

屈山人大均

南海人

自關中至

弱冠詩名動九州紉蘭餐菊舊風流何期絕塞干  
山外幸有清尊十日留獨漉泥深蒼隼沒五羊天  
遠白雲秋誰憐函谷東來後班馬蕭蕭一敝裘

重過代州贈李處士因篤在陳君上年署中

雁門春草碧且復過滹沱為念離羣友三年愁緒



多魯酒千鍾意不快龜山蔽目齊都隘卻來趙國  
訪廉頗還到關中尋郭解陳君心事望諸儔吾友  
高才冠雍州玉軸香浮鈴閣曉彩豪光照射堂秋  
人來楚客三閩後賦似梁園枚馬遊句注山邊餘  
舊壘五原關下臨河水青冢哀笳出漢宮白登奇  
計還天子窮愁那得一篇書幸有心期託後車又  
逐天風歸大海好憑春水寄雙魚

出雁門關屈趙二生相送至此有賦

一雁孤飛日關河萬里秋雲橫秦塞白水入代都  
流烽火傳西極琴尊聚北州登高欣有賦今見屈  
千牛

趙國佳公子翩翩又一時滿壺桑落酒臨別重相  
思路絕花驄汗情深越鳥枝賢兄煩鎖鑰邊塞寄

安危

趙生之兄為雁門參將

應州

灑南宮闕盡一塔挂青天法象三千界華戎五百  
年空旛搖夜月孤磬落秋煙頓覺諸緣減臨風獨

灑然

城內木塔遼清寧二年建

魏書太祖天賜二年六月發八部五百里內男丁築灑南宮門闕高十餘丈

太宗泰常五年四月丙寅起灑南宮

尚憶沙陀事明宗此郡生艱難當亂世太息軫遺  
氓鳳彩留荒井龍文照古城焚香祝天願果得見

昇平

五代史唐明宗應州人志云州有金鳳城明宗生於此

重至大同

頻年落落事孤征每到窮邊一寄情馬蹟未能追  
穆后虎頭空自相班生風吹白草桑乾岸月照黃  
沙盛樂城忽見丹青重惆悵君看曹霸阨才名

代府

中尉俊  
晰能畫

得伯常中尉書卻寄并示朱烈王太和二門人

岱雲東浮日西晡下有畸人事鉛槧忽來青鳥銜  
尺書月入軒櫺鐙吐燄別子三年斷音問敝裘白  
髮空冉冉引領常晞函谷關停驂尙憶終南廣瀕  
行把酒送余去重來何日當分陝腐儒衰老豈所  
望感此深情刻琬琰擔簦百舍不自量可能再上  
三峯險君家賢甥與令嗣舞雩歸詠同曾點尙論  
千秋品竝堪以吾一日年猶忝期君且復慰離愁  
勿向流光悲荏苒

淮上別王生略

疆畝  
協洽

子高徒抗手君獨淚霑衣送我山東去春空一雁

飛沂山朝靄合淮水夜鐙微去去懷知己愁來不可揮

孔叢子子高游趙平原君客有鄒文李節者與相友善及將還魯諸故人訣既畢文節送行三宿臨別文節流涕交頤于高徒抗手而已

贈蕭文學企昭 漢陽人

生年十五餘即與人事接中更世難嬰書史但涉  
獵率爾好為文蔚然富枝葉終媿康成學久曠周  
孔業日西歲將晏行事苦不立禮堂寫六經庶幾  
猶可及俗流好鄭衛淫詞自親狎用以扶道真十  
無一二合出門游萬里踽踽恆負笈晚得逢蕭君  
探蹟窮魯汲車中服子慎一見語便洽上攷三傳  
譌獨授尼父法方深得朋喜豈料歸歟急黃鶴對  
青山翩然鼓江楫浮雲翳楚天引領空於邑何時

復相從問奇補三篋惟期夕惕心不負朋簪盍

後漢書鄭玄傳戒其子益思曰所好羣書率皆腐敝不得於禮堂寫定傳之其人曰西方莫其可圖乎漢書劉歆傳黨同門妒道真世說鄭玄欲注春秋傳尚未成時行與服子慎過宿客舍先未相識服在外車上與人說己注傳意玄聽之良久多與己同乃就車與語曰吾久欲注尚未了聽君向言多與吾同今當盡以所注與君遂為服氏注

曲周拜路文貞公祠

凌煙當日記形容閩海風颯未得從故里尚留旋  
馬宅他鄉遙起若棠封公葬吳之洞庭山苔生宋璟祠前碣  
雪覆要離墓上松借問家聲誰可似只今荀氏有  
雙龍

德州過程工部

海上乘槎客年年八月來每逢佳節至長得草堂  
開老桂香猶吐孤鴻影自迴未論千里事一見即  
銜杯



過蘇祿國王墓

永樂十五年九月蘇祿國東王來朝歸次  
德州病卒遣官賜祭命有司營墳葬以王  
禮上親為文樹碑墓道留其僚從十人守  
墓其後子孫依而居焉余過之出祝版一  
通乃嘉靖年者宛然如故其字體今人亦  
不能及矣

豐碑遙見炳奎題尚憶先朝寵日禪世有國人供

灑掃每勤詞客駐輪躑九河冰壯彪狐出十二城

荒白鶴棲州北有十一連城下馬一為郊子問中原雲鳥正

淒迷

赴東六首著雍活難

萊人姜元衡訐告其主黃培詩獄株連二



三十人又以吳郡陳濟生忠節錄二帙首  
官指爲余所輯書中有名者三百餘人余  
在燕京聞之亟馳投到訟繫半年竟得開  
釋因有此作

人生中古餘誰能免尤悔况余庸駑姿側身涉危  
殆窺竄起東嶠長鯨翻勃澥斯人且魚爛十類同  
禽駭稟性特剛方臨難詎可改偉節不西行大禍  
何繇解

後漢書賈彪傳延熹元年黨事起太尉陳蕃爭之不能得朝廷  
寒心莫敢復言彪謂同志曰吾不西行大禍不解乃入維陽說  
城門校尉竇武尚書霍諝等  
使訟之桓帝以此大赦黨人

行行過瀛莫前途憩廣川所遇多親知搖手不敢  
言爾本江海人去矣足自全無爲料虎鬣危機竟  
不悛下有清直水上有蒼浪天旦起策青驃夕來

# 至華泉

詩河水清且直猗 古樂府東門  
行上有蒼浪天故下 爲黃口小兒

苦霧凝平皋浮雲擁原隰峯愁不注高地畏明湖  
溼客子從何來徬徨市邊立未得訴中情已就南  
冠繫夜半鶴鷓鳴勢挾風雨急枯魚問河魴嗟哉  
亦何及

古樂府枯魚過河泣何時悔復  
及作書與魴鱣相教慎出入

荏苒四五日乃至攀髯時夙興正衣冠稽首向園  
墀詩人岸獄中不忘恭敬辭所秉獨周禮顛沛猶  
在斯北斗臨軒臺三辰照九疑可憐訪重華未得  
從湘纍

羲仲殷東方伶倫和律管陰崖見白日黍谷回春  
煥柔艣下流澌輕車度危棧草木皆欣欣不覺韶

光晚大造雖無私薰蕕不同產奈此物性何鳩化  
猶鷹眼

天門誅蕩蕩日月相經過下閔黃雀微一旦決網  
羅平生所識人勞苦云無他騎虎不知危聞之元  
彥和尚念田晝言此舉豈足多永言矢一心不變  
同山河

魏書彭城王勰傳孝文之崩咸陽王禧謂勰曰汝非但辛勤亦  
危險至極勰對曰兄識高年長故知有夷險彥和握蛇騎虎不  
覺艱難 宋史田晝傳鄒浩諫立劉后得罪竄新州晝迎諸塗  
浩出涕晝正色諫曰使志完隱默官京師遇寒疾不汗五日死  
矣豈獨嶺海之外能死人哉願君毋  
以此舉自滿士所當爲者未止此也

子德李子聞余在難特走燕中告急諸友人  
復馳至濟南省視於其行也作詩贈之

急難良朋節扶危烈士情平居高獨行此去爲同  
盟撫劍來燕市揚鞭走易京黃埃隨馬漲黑水繫

船橫救宋裳初裹囚梁獄未成盈庭多首鼠中路  
復怔營已涉平原里端驅歷下城雲浮泉氣活日  
麗嶽林明夜樹蟬初引晨巢鵲亟鳴喜猶存卞璞  
幸不陷秦阮勞苦詞難畢悲歡事忽并橐籥勤問  
遺寢息共論評發憤皆公正姘修自幼清君賢關  
羽弟我媿季心兄將伯呼朝士同人召友生詩書  
仍燼溺禹稷竟冠纓頗憶過從數深嗟歲序更川  
巖句注險池館薊邱平每竝登山屐常隨泛月觥  
詩從歌伎采辯使坐賓驚祿位楊雄小囊錢趙壹  
輕與君俱好遯於世本無爭史論悲鉤黨儒流薄  
近名材能尊選慳仁義怵孤惇自得忘年老聊存  
處困貞不才偏累友有膽尙談兵坎窞何當出虞  
機詎可櫻殷勤申別款落莫感精誠禽海填應滿

鼇山抃豈傾相期非早莫渭鈞與莘耕

墨子公輸般為楚設機械以攻宋墨子聞之自魯往裂裳裹足日夜不休十日十夜而至於郢

史記伯夷傳非公正不發憤楚辭招魂朕幼清以廉潔兮

史記季布傳布弟季心氣蓋關中為任俠長事袁絲弟畜灌夫籍福之屬漢書揚雄傳片人賤近而貴遠親見揚子雲祿位容貌不能動人故輕其書後漢書趙壹傳文籍雖滿腹不如

一囊錢楚辭天問鼇戴山抃張衡思玄賦鼇雖抃而不傾

樓桑廟

屠維作噩

大雪閉河山停驂阻燕界日出見平岡廟制頗宏大昭烈南面尊其旁兩侯配陰森宮前木蕪沒畦首菜遺像纏風塵荒碑委榛蒯痛惟初平時中原已橫潰跳身向荆益歷險誠不悔終焉嗣漢業上帝居種類獨此幽并區頻在衣冠外不得比南陽何由望豐沛尚想舊宅桑童童狀車蓋黃屋既飄颻霓旌亦杳靄惟有異代臣過瞻常再拜不及二



將軍提戈當一隊

三月十二日有事於欝宮同李處士因篤

餘生猶拜謁吾友復同來筋力愁初減天顏佇一  
迴巖雲隨馭下寢仗夾車開未得長陪從辭行涕  
泗哀

贈李貢士嘉故城人時年八十

居然漢代表遺民猶向甘陵說黨人久矣泥塗嗟  
絳縣不妨魚釣老河濱花香元亮籬前酒雨墊林  
宗野外巾此日耆英誰得似飲和先作一方春

淮南子不言而能飲人以和

邯鄲

趙國地生毛叢臺野火燒平原與馬服纍纍葬枯  
槁飢鳥啄冬雪獨雁號寒郊有策無所用拂拭千



金刀豈聞蕭王來北發漁陽豪畫臥温明殿蒼生  
正嗷嗷太息復何言此身隨所遭

史記趙世家民譌言曰趙爲號秦爲笑以爲不信視地  
之生毛漢書五行志高后元年五月丙申趙叢臺災

### 邢州

太行從西來勢如常山蛇邢洛在其間控壓連九  
河唐人守昭義桀驚不敢過憑此制山東腹心實  
非他事已遡悲風芒然吹黃沙乞食向野人從之  
問桑麻

舊唐書李抱真傳爲昭義軍節度使時田悅朱滔王武俊相繼  
反叛及上幸梁州抱真獨於擾攘傾潰之中以山東三州外抗  
羣賊內輯軍士  
羣賊深憚之

### 自大名至保定子德已先一月西行賦寄

念爾西歸日嗟余望路歧殊方頻邂逅千里各差  
池木落燕臺早霜封華掌遲秦郊須置驛莫後鄭

當時

亡友潘節士之弟耒遠來受學兼有投詩答  
之

生平不擬託諸侯吾道仍須歷九州  
落落關河蓬轉後蕭蕭行李雁飛秋  
爲秦百姓皆黔首待漢儒林已白頭  
何意故人來負笈艱難千里媿從游  
十年離別未言還楚水楓林極望間  
野雀莫歸吳季廟寒濤秋擁伍胥山  
人琴已逝增哀涕笠屨相看失壯顏  
獨有士龍年最少一朝詞筆動江關

述古

上章  
闕茂

微言旣以絕一變爲從橫下以游俠權上以刑名  
衡六國固蚩蚩漢興亦攘攘不有董夫子大道何  
由明孝武尊六經其功冠百王節義生人材流風

被東京世儒昧治本一槩而相量於乎三代還此人安可忘

楚辭九章懷沙同糅  
玉石兮一槩而相量

六經之所傳訓詁爲之祖仲尼貴多聞漢人猶近古禮器與聲容習之疑可睹大哉鄭康成探蹟靡不舉六藝既該通百家亦兼取至今三禮存其學非小補後代尙清談土苴斥鄒魯哆口論性道捫籥同矇瞽

蘇子瞻曰喻生而眇者不識日或告之曰日之光如燭捫燭而得其形他日揣籥以爲日也

五國竝時亡世道當一變掃地而更新三王功可見鼓琴歌有虞鈞者知其善區區山澤間道足開南面天步未回旋九州待龍戰空有濟世心生不逢堯禪何必會風雲弟子皆英彥俗史不知人廖

# 落儒林傳

文中子書五國並時而亡蓋傷先王之道盡墜故君子大其言極其敗於是乎掃地而求更新也 子游汾亭上鼓琴有釣者曰美哉琴心也傷而和怨而靜在山澤而有廊廟之志子驟而歌南風釣者曰嘻非今日事也道能利生民功足濟天下其有虞氏之心乎不如舜自鼓也聲存而操變矣

## 德州講易畢奉柬諸君

在昔尼父聖韋編尚三絕况於章句儒未曉八卦  
 列相看五十餘行事無一達坐見悔吝叢舉足防  
 蹉跌日昃乃研思猶幸非大耋微言詎可尋斯理  
 庶不滅寡過殊未能豈厭丁寧說是時秋雨開涼  
 風起天末蟋蟀吟堂階疏林延夕月草木得堅成  
 吾人珍晚節亮哉歲寒心不變霜與雪憂患自古  
 然守之俟來哲

## 輓殷公子岳

憶昔過從日偏承藻鑑殊堂中延太守門外揖王  
符木葉空郊晚魚鱗大澤枯邈如人世隔無復問  
黃鑪

八俊名空大千秋事已違嶺雲緣旆下溪鳥夾棺  
飛薏苡當含貝桄榔待復衣寂寥漳水上猶望楚  
魂歸

寄張文學韶時淮上有築隄之役重光大淵獻

冬來寒更劇淮堰比何如遙憶張平子孤燈正勘  
書江上雙鬢老文字六朝餘得所寄瘞鶴銘辨愁絕無同調  
蓬飄久索居

南史康絢傳天監十四年築浮山堰是冬寒甚淮泗盡凍士卒死者十七八

雙雁

雙雁東北飛飛飛向城闕聲含海上颿影帶吳山



月有客從南來遺我一書札上寫召旻詩如彼泉池竭下列周鼎文食人象饕餮書成重密緘一字一泣血傳之與貴人相視莫敢發所計一身肥豈望天下活

呂氏春秋周鼎著饕餮有首無身食人未咽害及其身

### 夏日

首夏多恆風塵霾蔽昏旦舞雩告山川白紙催州縣未省答天心且望除民患黍苗不作歌碩鼠徒興歎仗馬適一鳴身名已塗炭貝玉方盈朝此曹何所憚博士有正先實趣秦時亂

漢書京房傳昔秦時趙高用事有正先者非刺高而死高威自此成故秦之亂正先趣之

末俗無恆心疾貧而好勇不能事田園何況談周孔出門持刀尺鑄錢兼掘冢矧此大東謠齊民半



流穴不見瓜寧男死猶被天寵鳴弓宿鳥驚躍馬  
浮埃動顧謂同行人王侯寧有種

漢書王莽傳上谷諸夏自請願說瓜田儀葬以為中郎使出儀  
儀文降未出而死莽求其尸葬之為起冢祠室諡曰瓜寧殤男  
幾以招  
來其餘

### 秋風行

白露早下秋風涼誰家置酒開華堂秦國丞相南  
面坐三川郡守趨奉觴燕娥趙女調清瑟六博彈  
棋費白日致富應多文信金論功詎足穰侯匹莫  
欺張耳鬢如絲及見夷門大會時車中公子常虛  
左上客侯生衣敝衣人生富貴駒過隙唯有榮名  
壽金石嗟嗟此曲難重陳柱摧絃斷長愁人

史記李斯傳長男由為三川守告歸咸陽李斯置酒於家百官  
長皆前為壽門廷車騎以千數張耳傳張耳者大梁人也其  
少時及魏公子無忌為客  
詩奄忽隨物化榮名以為寶古

靜樂

邑枕汾川首城分并塞支馬牛遺牧地材木賸山  
陲互澤魚空後腥風虎下時樓煩雖善射不救漢  
王危

太原寄王高士錫闡

游子一去家十年愁不見愁如汾水東不到吳江  
岸異地各榮衰何繇共言宴忽睹子綱書欣然一  
稱善王君尺牘多作篆書知交盡四海豈必無英彥貴此金石  
情出處同一貫太行冰雪積沙塞飛蓬轉何能久  
不老坐看人間換惟有方寸心不與玄鬢變

三國志注張紘字子綱好文學又善楷篆與孔融書皆自書融報紘曰前勞手筆多篆書每舉篇見字欣然獨笑如復覩其人

孟縣北有藏山云是程嬰公孫杵臼藏趙孤

處

空山三尺雪匹馬向荒榛窈洞看冰柱危峯遲日  
輪水邊寒啄鶴松下晚樵人恐有孤兒在尋幽一  
問津

讀李處士顥襄城紀事有贈

玄默  
困敦

處士之父可從崇禎十五年以壯士隸督  
師汪公喬年麾下以五千人勦賊至襄城  
死之處士年十六貧甚與其母彭氏并日  
而食力學有聞越二十九年始得走襄城  
爲汪公及其父設祭招魂以歸余與處士  
交爲之作詩

躑躅荒郊醉一尊白楊青火近黃昏終天不返收  
嶠骨異代仍招復楚魂湛阪愁雲隨獨雁潁橋哀

水助嘒猿五千國士皆忠鬼孰似南山孝子門

左傳襄十六年楚公子格帥師及晉師戰於湛阪

### 寄楊高士瑀

廿載江南意愁來更渺茫  
友朋嗟日損雞犬覺年荒  
水歷書池淨山連學舍長  
但聞楊伯起弦誦夜琅琅

### 齊祭器行

歲重光大淵獻臨淄發地得古祭器數十  
事監司攬而有之

太公封齊廿八世春禘秋嘗長有事猶從三代識  
遺聲每見九夷朝祭器器歷商周制度工相傳  
丁癸及桓公花紋不似萊人物法象仍疑兩敦同  
牛山下涕何悲苦歲久光華方出土夏后璜偏入向

鸞魯宮寶又歸陽虎歷下秋風動夕螢古來神物亦飄零誰知柏寢千年器異日還陳漢武庭

禮記樂記齊者二代之遺聲也齊人識之故謂之齊左傳襄六年陳無宇獻萊宗器于襄宮禮記明堂位有虞氏之兩敦

左傳哀十四年向魋出於衛地公文氏攻之求夏后氏之璜焉與之他玉而奔齊史記封禪書少君見上上有故銅器問

少君少君曰此器齊桓公十年陳於柏寢已而案其刻果齊桓公器

### 題李先生矩亭

德州東二十五里矩亭故鄉舉思伯李君誠明讀書處天啓中權奄柄國聞君通陰陽象緯之學遣使徵之辭疾不就潔志以終其子源修是亭以表遺躅余爲之詩

董生祠畔子雲亭澗雨巖虹望獨扃門外曉寒縈帶草林端秋散照書螢長留直道扶千載自見遺文表六經今日似君還肯構應知家學本趨庭

瓠

瓠實向秋侵  
嗚然繫夕林  
不材留苦葉  
槁死亦甘心  
偶伴嘉蔬植  
還依舊圃尋  
削瓜輸上俎  
剝棗遜清斟  
衛女河梁迴  
涇師野渡深  
未須驚五石  
應信直千金  
作器疑無用  
隨流諒不沈  
試充君子佩  
聊比國風吟

左傳襄十四年諸侯之大夫從晉侯伐秦及涇不濟叔向見叔孫穆子穆子賦匏有苦葉叔向退而具舟魯人莒人先濟

土門旅宿

在獲鹿縣西南十里

歲歲征驂詎有期  
棲棲周道欲安之  
尼公匪兕窮何病  
尚父維鷹老未衰  
市酒薄驅冬宿冷  
山蕤輕壓曉行飢  
從知宇宙今來闊  
不似園林獨臥時

漢書平帝紀追諡孔子曰襄城宣尼公

燕中贈錢編修秉鐙

昭陽赤奮若



一別秦淮將廿載天涯垂老看猶在斷煙愁竹泣  
蒼梧禿筆悽文來漲海燕市雞鳴動客輪九門馳  
道足黃塵相逢不見金臺侶但說荆軻是酒人

先妣忌日

風木凋零已過時一經猶得備人師聞絲欲下劉  
駸泣執卷方知孟母慈秋雨秀連中野蔚夕陽光  
起北園葵無窮明發千年慨豈獨杯棬忌日思

顏氏家訓荒亂以來雖寒峻之子能讀孝經論語者尚為人師  
雖奕葉冠冕不曉書記者莫不耕田養馬南齊書劉駸傳母  
沒十餘年每聞絲竹之聲未嘗不歔歔流涕  
晉陸機園葵詩種葵北園中葵生鬱萋萋

自章邱回至德州則程工部逝已三日矣

高秋立馬鮑山旁旅雁初飛木葉黃十載故人泉  
下別交情多媿郅君章

時張文學詔自燕  
中來視其含斂

後漢書獨行傳范式字巨卿與汝南張劭為友劭字元伯後元  
伯寢疾同郡郅君章殷子徵晨夜省視元伯臨盡歎曰恨不見

吾死友子徵曰吾與君章盡心於子是非死友復欲誰求元伯曰若二子者吾生友耳山陽范巨卿所謂死友也元伯尋卒式往奔喪未及到而喪已發引極不肯進停柩移時見有素車白馬號泣而來其母望之曰是必范巨卿也式執縛引柩於是乃前

### 有歎

少小事荀卿佔畢更寒暑慨然青雲志一旦從羈旅西游到咸陽上書寤英主門庭正翕集車騎來千數復有金石辭粲爛垂千古如何壯士懷但慕倉中鼠

家世二千石結髮常自修譬如寡婦心本慕共姜儔不幸汙盜賊遂忘淫佚羞彼巨先語撫心悼遷流如登千仞岡失足竟不收勉哉堅自持無遺朋友憂

漢書游俠傳原涉字巨先或譏涉曰子本結髮自修以行喪推財禮讓為名正復離取仇猶不失仁義何故遂自放縱為輕俠

之徒乎涉應曰子獨不見家人寡婦邪始自然敕之時意迺慕宋伯姬及陳孝婦不幸壹為盜賊所汗遂行淫佚知其非禮然不能自還吾猶此矣後漢書馬援傳居高堅自持

### 哭歸高士

弱冠始同遊文章相砥厲中年共墨衰出入三江  
汭悲深宗社墟勇畫澄清計不獲騁良圖斯人竟  
云逝

禮記儒行近文章砥厲廉隅

峻節冠吾儕危言驚世俗常為扣角歌不作窮途  
哭生耽一壺酒沒無半間屋惟存孤竹心庶比黔  
婁躅

太僕經鏗鏗君曾祖諱有光字熙甫世稱震川先生三吳推學者安貧稱

待詔君叔祖諱子慕字季思清風播林野及君復多材儒流嗣

弓冶已矣文獻亡蕭條玉山下

後漢書儒林傳說  
經鏗鏗楊子行

酈生雖酒狂亦能下齊軍發憤吐忠義下筆驅風  
雲平生慕魯連一矢解世紛碧雞竟長鳴悲哉君  
不聞

左傳文十八年卜楚邱占之曰  
齊侯不及期非疾也君亦不聞

### 亭林詩集卷之四

亭林詩集卷之五

廣昌道中

闕逢攝提格

匹馬去燕南，易京大如礪。五回春雪深，淅上孤城閉。行行入飛狐，夕駕靡遑稅。融冰見曉流，老樹陵寒霽。啄鵲馴不驚，臥犬安無吠。問客何方來，幽都近如沸。出車日鞞鞞，戈矛接江裔。此地幸無兵，山田隨樹藝。且偷須臾間，未敢謀卒歲。

後漢書公孫瓚傳前此有童謠曰燕南垂趙北際中央不合大如礪水經注代郡廣昌縣東南有大嶺世謂之廣昌嶺嶺高四十餘里二十里中委折五回方得達其上嶺故嶺有五回之名左傳昭元年趙孟曰吾兄弟比以安龙也可使無吠

久客燕代間，遂與關山老。流連王霸亭，躑躅劉琨道。枯萸春至遲，落木秋來早。獨往茲愴然，同遊昔誰好。三楚正干戈，沅湘彌浩浩。世乏劉荊州，託身焉所保。縱有登樓篇，何能盪懷抱。因思塞北風，一

寄南飛鳥昔年與李子德同宿此縣

後漢書王霸傳將弛刑徒六千餘人與杜茂治飛狐道堆石布土築起亭障自代至平城二百餘里

匹碑從飛狐入薊

寄問傅處士土堂山中

向平嘗讀易亦復愛名山早跨青牛出昏騎白鹿  
還太行之西一遺老楚國兩龔秦四皓春來洞口  
見桃花儻許相隨拾芝草

晉書陶淡結廬於長沙臨湘山中養一白鹿以自偶親故有候之者輒移渡澗水莫得近之

與胡處士庭訪北齊碑

春羶亂青山卉木苞未吐繞郭號荒雞中田散野  
鼠策杖向郊坰幽人在巖戶未達隱者心聊進蒼  
生語一自永嘉來神州久無主十姓迭興亡高光  
竟何許棲棲世事迫草草朋儕聚相與讀殘碑含



愁弔今古

詠史

王良既策馬天弧亦直狼中夜視北辰九野何茫茫  
秦政滅六國自謂過帝皇豈知漁陽卒狐鳴叢  
祠旁誰為刑名家至今怨商鞅

史記天官書王良策馬車騎滿野 宋史天文志弧矢九星在狼星東南天弓也矢不直狼為多盜 鹽鐵論商鞅峭法長利

秦人不聊生 相與哭孝公

商紂為黎蒐遂啓東夷叛楚靈一會申俄召乾谿  
患甲兵豈不多人人欲從亂惟民國所依疾乃盈  
其貫皇矣監四方得民天所贊

路光祿書來敘江東同好諸友一時殂謝感  
歎成篇

削迹行吟久不歸修門舊館露先晞中年早已傷

哀樂死日方能定是非彩筆夏枯湘水竹清風春  
盡首山薇斯文萬古將誰屬共爾衰遲老布衣

楚辭招魂魂兮歸來入修門此晉書王羲之傳謝安嘗謂羲之曰中年傷於哀樂與親友別輒作數日惡太史公報任少卿書要之死曰然後是非乃定

### 過矩亭拜李先生墓下

人生無賢愚大節本所共蹉跎一失身豈不負弦  
誦卓哉李先生九流稱博綜心鄙馬季長不作西  
第頌屏居向郊坰食淡常屢空清修比范丹聰記  
如應奉力學不求聞終焉老家街同時程中丞一  
疏亦驚衆玉璽安足陳亟進名臣用

南時漳河旁得玉璽上疏言秦璽不足珍國家以賢為寶薦黨籍諸臣十餘人不納遂謝病歸黨論正紛拏

中朝竝囂訟世推山東豪三李尤放縱祠奄與哭  
典後先相伯仲名並見欽定逆案初踰士類閑竟折邦家棟

悲哉五十年風塵尚瀕洞我來拜遺阡增此儒林  
重雖無馨效接猶有風流送自非隨武賢九原誰  
與從

後漢書馬融傳爲梁冀作大將軍西第頌以此頗爲正直所羞  
應奉傳少聰明自爲兒童及長凡所經履莫不暗記讀書五  
行竝下漢司隸校尉魯峻碑休神家術

### 潘生次耕南歸寄示

知君心似玉壺清未肯緇塵久維京若到吳閶尋  
舊蹟五噫東去一梁生

### 子房

天道有盈虛智者乘時作取果半青黃不如待自  
落始皇方侈時土宇日開拓海上標東門長城繞  
北郭欲傳無窮世更乞長生藥子房天下才是時  
無所託東見倉海君用計亦疏略狙擊竟何爲煩

彼十日索譬之虎負嵎矜氣徒手搏歸來遇赤精  
奮戈起榛薄嶢關一戰破藍田再麾卻嘖嘖軹道  
旁共看秦王縛既已報韓仇此志誠不忤遂赴赤  
松要無負圯橋諾

通鑑慕容農言於慕容垂曰夫取果於未熟與自落不過早晚  
旬日之間然其難易美惡相去遠矣南史陸法和傳侯景之圍  
臺城也或問之曰事將何如法和曰凡人取果宜待熟時不擦自落

### 刈禾長白山下

載耒來東國年年一往還禾垂墟照晚果落野禽  
間食力終全節依人尚厚顏黃巾城下路獨有鄭  
公山

齊乘北齊以黃巾城立章邱縣  
其東有鬻山鄭康成注書其上

### 歲莫

平生慕古人立志固難滿自覺分寸長用之終已

短良友日零落悽悽獨無伴流離三十年苟且圖  
飽煖壯歲尙無聞及今益樗散治蜀想武侯匡周  
歎微管願一整積風俗人謂迂緩孤鐙照遺經雪  
深坐空館

一歲倏適盡我行復何如何爲窮巷中悄然日閒  
居未敢聽輪扁且讀堂上書糟粕雖已陳致治良  
有餘典謨化刀筆衣冠等猿狙孰令六代後一變  
貞觀初四海皆農桑弦歌徧井閭我亦返山中耦  
耕伴長沮

莊子今取猿狙而衣以周公之服彼必齷齪挽裂盡去而後慊

兄子洪善北來言及近年吳中有開淞江之  
役書此示之

旃蒙單閱

淞江東流水波緩王莽之際尤枯旱平野雲深二

陸山荒波草沒吳王館五十年來羹芋魁頓令澤  
國生蒿萊豈無循吏西門豹停車下視終徘徊少  
時來往江東岸人代更移年紀換卽今海水變桑  
田况於爾等皆童丱乍看畚鍤共歡呼便向汚邪  
祝一壺豈知太平之世飴甘荼川流不盈澤得瀦  
風雨時順通祈雩春祭三江秋祭五湖衣冠濟濟  
郊壇趨歲輸百萬供神都江頭擔酒肴江上吹笙  
竽吏無敲扑民無逋嗟余已老何時見久客中原  
望鄉縣那聞父老復愁兵秦關楚塞方酣戰忽憶  
秋風千里萼淞江亭畔坐垂綸還歸被褐出負薪  
相逢絕少平生親怪此僮夫是何人

漢書翟方進傳汝南有鴻隙陂王莽時常枯旱易水流而不盈  
越絕書春際二江秋祭五湖因其時爲之立祠

閏五月十日



重逢閏五月瀘漫客山東郡國戈鋌裏園陵灌莽  
中草穿新壘綠花隔舊京紅更憶王符老飄淪恨  
不同王徵君漢昔日同諸孝  
陵行香今年七十七矣

杜子美詩瀘漫  
山東一百州

春秋書魯月猶是謂文王舊國還豐鎬遺民自夏  
商神遊弓劍遠天與卦爻長此日追休烈於戲不  
可忘

公羊傳隱公元年春王正月  
月王者孰謂謂文王也

### 過張貢士爾岐

緇帷白室覩風標爲歎斯人久寂寥濟水夏寒清  
見底石田春潤晚生苗長期六籍傳無絕能使羣  
言意自消竊喜得逢黃叔度頻來聽講不辭遙

莊子孔子遊乎緇帷之林休坐乎杏  
壇之上又曰瞻彼闕者虛室生白

送程工部葬

文獻已淪亡長者復云徂一往歸重泉百年若須  
與寥寥楊子宅惻惻黃公鑪揮涕送故人執手存  
遺孤末俗雖衰漓風教猶未渝願與此邦賢修古  
敦厥初

路舍人客居太湖東山三十年寄此代柬

翡翠年深伴侶稀清霜顛顛減毛衣自從一上南  
枝宿更不回身向北飛

孫徵君以孟冬葬於夏峯時僑寓太原不獲  
執紼適吳中有傳示同社名氏者感觸之意  
遂見乎辭

老不越疆弔吾衰況疏慵遙憑太行雲迢遞過夏  
峰泉源日清泚上有百尺松憶叨忘年契一紀秋

徂冬常思依蜀莊有懷追楚龔不得拜靈輒限此  
關山重會葬近千人來觀馬鬣封儻有徐孺子隻  
雞遠奔從一時諸生閒得無少茅容俗流鶩聲華  
考實皆凡庸淄澠竟誰知管華稱一龍我無人倫  
鑒焉敢希林宗惟願師伯夷寧隘毋不恭嗟此衰  
世意往往纏心胸回首視秋山肅矣霜露濃

禮記檀弓下五十無車者不越疆而弔人 楊子法言蜀  
莊沈冥 呂氏春秋孔子曰淄澠之水合易牙嘗而知之

漢三君詩 柔北 執徐

父老苦秦法願見除殘凶三章布國門企踵咸樂  
從雖非三王仁寬大亦與同傳胙歷四百令名垂  
無窮

右高祖

文叔能讀書折節如儒生一戰摧大敵頓使海寓

平改化名節崇磨鈍人才清區區黨錮賢猶足支危傾

右光武

卓矣劉豫州雄姿類高帝一身寄曹孫未得飛騰勢立志感神人風雲應時至翻然遂翺翔二豪安得制

右昭烈

楚僧元瑛談湖南三十年來事作四絕句

共對禪鐙說楚辭國殤山鬼不勝悲心傷衡嶽祠前道如見唐臣望哭時

宋史朱昂傳父葆光當梁氏篡唐與唐舊臣顏充李濤輩挈家南渡寓潭州每正日冬至必序立南嶽祠前北望號慟殆二十年

孤墳一徑楚山尖鐵石心肝老孝廉流落他方餘

惠遠撫琴無語憶陶潛先兄同年友長沙陶君汝霖

督師公子竟頭陀詩筆崢嶸浩氣多兩世心情知

不遂待誰更奮魯陽戈武陵楊公

夢到江頭橘柚林衲衣桑下愜同心不知今日滄

浪叟鼓枻江潭何處深

### 賦得檐下雀

力小不成巢翺飛無定止所謀但一枝徬徨靡可恃曾窺王謝堂不作銜泥壘雖依檐下宿無異深林裏豈不慕高明其奈驚丸餌唯應罷官時殷勤數來此

漢書楊雄傳高明之家鬼瞰其室鄭當時傳先是下邳翟公為廷尉賓客填門及廢門外可設爵羅

### 薊門送子德歸關中

與子窮年長作客子非朱顏我頭白燕山一別八

年餘再裏行騰來九陌君才如海不可量奇正縱橫勢莫當彈箏相缶坐太息豈可日月無弦望

字望

作平聲用阮籍詩是時鶉火中日月正相望

為我一曲歌伊涼挈十一州歸

大唐奇材劍客今豈絕奈此舉目都茫茫薊門朝士多狐鼠舊日鬚眉化兒女生女須教出塞妝生男要學鮮卑語常把漢書挂牛角獨出郊原更誰與自從烽火照桑乾不敢宮前問禾黍子行西還渡蒲津正喜秋氣高嶙峋華山有地堪作屋相與結伴除荆榛

李陵與蘇武詩安知非日月弦望自有時唐書大中五年沙州人張義潮以瓜沙伊肅鄯甘河西蘭岷廓十一州歸於有司

顏氏家訓齊朝一士夫嘗謂吾曰我有一兒年已十七頗曉書疏教其鮮卑語及彈琵琶稍欲通解以此伏事公卿無不寵

愛吾時俛而不答

李生符自南中歸檣李三年矣追惟壯遊兼



示舊作

一卷別南中孤帆自歸去文飛鶴拓雲墨染且蘭  
樹丈夫行萬里投分各有遇明發著萊衣未肯朱  
門住相送驛路旁落英連古戍儻有舊遊人北望  
懷徐庶

二月十日有事於欒宮

疆圍大荒落

青陽回軒邱白日麗蒼野封如禹穴平木類十山  
赭不忍寢園荒復來奠尊斝彷彿見威神雲旗導  
風馬當年國步蹙實歎謀臣寡空勞宵旰心拜戎  
常不暇賊馬與邊烽相將潰中夏殲陽不東升節  
士長喑啞及今擐甲兵無復圖宗社飛章奏天庭  
蹇蹇焉能舍華陰有王生宏伏哭神牀下亮矣忠  
懇情咨嗟傳宦者遺臣日以希有願同誰寫

左傳昭十五年王靈不及拜戎不暇楚辭離騷余固知謇謇之為患兮忍而不能舍也

### 贈獻陵司香貫太監宗

蕭瑟昌平路行來十九年清霜封殿瓦野火偏山  
阡鎬邑風流盡邛陵歲月遷空堂論往事猶有舊  
中涓

陵下人言上年冬祭時有聲自寶城出至袞  
恩殿食頃止人皆異之

昌平木落高山出仰視神宮何萃穉昭陵石馬向  
天嘶誰如李令心如日有聲隆隆來隧中駿奔執  
爵皆改容萇弘自信先君力獨拜秋原御路東

李商隱復京詩天教李令心如日可要昭陵石馬來漢書五行志成帝和平二年正月沛郡鐵官鑄鐵不下隆隆如雷聲

左傳昭二十三年南宮極震萇弘謂劉文公曰君其勉之先君之力可濟也僖二十二年晉文公卒將殯於曲沃出絳柩

有聲如牛卜偃使大夫拜

過郭林宗墓

路畔纍纍墓石多中郎遺愧定如何應憐此日知名士到死猶穿吉莫鞞

北齊書恩倖傳有開府薛榮宗常自云能使鬼帝信之經古冢榮宗問舍人元行恭是誰冢行恭戲之曰林宗冢復問林宗是誰行恭曰郭元貞父榮宗因前奏曰向見郭林宗從冢出著大帽吉莫鞞操馬鞭問臣我家阿貞來否

介休

淡靄生巖際奔泉下石間龍蛇方起陸雀鼠尚爭山縣西南三十里有雀鼠谷雨靜前邨市秋凋故國顏介君祠廟在風義復難攀

靈石縣東北三十五里神林晉介之推祠

古人有至心不在狷與忍國祿既弗加吾身可以隱去矣適其時耕此荒山畛更與賢母偕邱壑情同允卓哉鸞鳳姿漂漂高自引嚮使屬戎行豈其

遜枝軫出處何必齊此心期各盡末世多浮談有  
類激小忿割股固荒唐焚山事可哂微哉仲子廉  
立操同蚯蚓遺祠君故鄉父老事惟謹牡丹異凡  
花春深洗鉛粉況此黃蘆林晚送秋風緊厲彼頑  
鈍徒英名代無隕

賈誼弔屈原賦風漂漂其  
高逝兮夫固自引而遠去

### 霍北道中懷關西諸君

苦雨淹秋節屯雲擁霍州  
蟲依危石響水出斷崖  
流驛路愁難進山亭悵獨留  
遙知關令待計日盼  
青牛

### 河上作

龍門下雷首自古稱西河入自積石來出塞復透  
迤呂梁懸百仞孟門高峩峩遠矣大禹功山澤得

所宜靈蹟表華巖金行鎮西垂黃虞日已遠曩怒  
尋干戈去年方鬪爭掘壕守朝那車騎如星流衣  
裝兼橐駝狼弧動箭鏃參伐揚旂麾嗟此河上軍  
來往何時罷今年暫寢兵邏卒猶譏訶手持一尺  
符予錢方得過追惟狄泉陷地底生蒼鵝窳窳來  
攫人達路橫長蛇寰區恣刀俎飛走窮網羅萬類  
不足飽螻蟻其奈何仰希神明眷下戢陽侯波行  
將朝白帝一訴斯民罹猿鳥既長吟窮人亦悲歌  
歌止天聽回勿厭辭煩多

水經注晉永嘉元年維陽東北步廣里地陷有二鷲出蒼色者飛翔冲天白色者止焉後五年劉曜王彌入維帝居平陽

雨中至華下宿王山史家

重尋荒徑一衝泥谷口牆東路不迷萬里河山人  
落落二秦兵甲雨淒淒松陰舊翠長浮院菊藥初



黃欲照畦自笑漂萍垂老客獨騎羸馬上關西

過李子德

憶昔論交日星霜一紀更及門初拜母讓齒忝為  
兄樹引流泉細山依出月明居在月明山下相看仍慰藉

均不負平生

積雨秋方漲相迎到華陰水驚龍鬪駛泥怯馬蹏  
深尚阻東軒佇多煩瀨口尋白雲清渭色聊足比  
君心

晉陶淵明停雲詩靄靄停雲濛濛時雨八表同昏平路伊阻靜  
寄東軒春醪獨撫良朋悠邈搔首延佇 文選任彥升有贈郭  
桐廬出谿口見候余既未至郭  
仍進郵維舟久之郭生始至詩

拜跪煩兒女追陪有弟昆令弟油篤雲開王翦廟風起

魏公原俠氣凌三輔哀思叫九閭向來多感激不  
覺倒清尊擬卜南山宅先尋北道鄰關河愁欲徧



縞紵竟誰親異國逢矜式郭君傳芳時  
爲富平令同人待隱淪

李處士顯便思來嶽頂揮手謝風塵

### 阜帽

阜帽冬常著青山老自看鳥憐池樹靜雲近嶽天  
寒淡食隨人給藜牀任地安閒來過道院不爲訪  
金丹

### 采芝

采芝來谷底汲水到池坳不礙風塵際常觀氣化  
交晨光明虎蹟夕霧隱鳶巢自昔幽人住攀厓此  
結茅

### 寄李生雲霑時寓曲周僧舍課子衍生

歲晚漳河朔雪霏僕夫持得尺書歸三冬文史常  
堆案一室弦歌自掩扉古廟薪殘燒粥冷荒陂水

少食魚稀何如長白山中寺莫使匡時雅志違

春雨 著雍 敦祥

平生好修辭著集逾十卷本無鄭衛音不入時人  
選年老更迂疏制行復剛褊東京耆舊盡羸瘵留  
餘喘放蹟江湖間猶思理墳典朝來閱徵書處士  
多章顯何來南郡生心期在軒冕幸得比申屠超  
然竟獨免春雨對空山流泉傍清畎枕石且看雲  
悠然得所遣未敢慕巢由徒誇一身善窮經待後  
王到死終黽勉

顏氏家訓吾家世文章甚為典正不從流俗梁孝元在藩邸時  
選西府新文史記無一篇見錄者亦以不偶於世無鄭衛之音  
故也 後漢書申屠蟠傳黃瓊卒歸葬江夏四方名豪會帳下  
者六七千人互相談論莫有及蟠者惟南郡一牛與相酬對既  
別執蟠手曰君非聘則徵如是相見於上京矣蟠勃然作色曰  
始吾以子為可與言也何意乃相徇效樂貴之徒邪因振手而  
去不復與言 又曰黨錮之禍惟蟠超  
然免於評論 唐錢起詩初服傍清畎

寄同時二三處士被薦者

關塞逾千里交遊更幾人  
金蘭情不二猿鶴意相親  
鄴下黃塵晚商顏綠草春  
與君成少別知復念蘇純

後漢書蘇純字桓公性切直士友咸憚之至乃相謂曰見蘇桓公患其教責人久不見又思之

井中心史歌

崇禎十一年冬蘇州府城中承天寺以久旱浚井得一函其外曰大宋鐵函經錮之再重中有書一卷名曰心史稱大宋孤臣鄭思肖百拜封思肖號所南宋之遺民有聞於志乘者其藏書之日爲德祐九年宋已亡矣而猶日夜望陳丞相張少保統兵外來以復土宇至於痛哭流涕而禱之天

地盟之大神謂氣化轉移必有一日於是郡中之人見者無不稽首驚詫而巡撫都院張公國維刻之以傳又爲所南立祠堂藏其函祠中未幾而遭國難一如德祐末年之事嗚呼悲矣其書傳至北方者少而變故之後又多諱而不可見此書者三十餘年而今復覩之富平朱氏昔此書初出太倉守錢君肅樂賦詩二章崑山歸生莊和之八章及浙東之陷張公走歸東陽赴池中死錢君遯之海外卒於琅琦山歸生更名祚明爲人尤慷慨激烈亦終窮餓以沒獨余不才浮沈於世悲年運之日往值禁罔之逾密而見賢思齊獨立不懼故

作此歌以發揮其事云爾

有宋遺臣鄭思肖痛哭元人移九廟獨力難將漢  
鼎扶孤忠欲向湘纍弔著書一卷稱心史萬古此  
心心此理千尋幽井置鐵函百拜丹心今未死扃  
運應知無百年得逢聖祖再開天黃河已清人不  
待沈沈水府留光彩忽見奇書出世間又驚牧騎  
滿江山天知世道將反覆故出此書示臣鵠三十  
餘年再見之同心同調復同時陸公已向匡門死  
信國捐軀赴燕市昔日吟詩弔古人幽篁落木愁  
山鬼嗚呼蒲黃之輩何其多  
宋末蒲壽庚黃萬石所南見此當  
如何

禮記射義爲人臣者以爲臣鵠

夏日



渴日出林表炎風下高山火旻雲去微谷井泉來  
慳晨露薄不濡夕氛橫空殷百卉變其姿蕉萃侔  
榛菅深居廢寢與無計離人寰而況蚩蚩氓謀食  
良已艱眷此負耒勤羨彼濯流還素月方東生易  
忍桑榆間乃悟處亂規無營心自閒詎如觸熱人  
未老毛髮斑坐須爽節至一尊散襟顏

淮南子聖人之處亂世若夏暴而待莫桑榆之間逾易忍也

### 梓潼篇贈李中孚

後漢書獨行傳李業字巨游廣漢梓潼人也元始中舉明經除為郎去官杜門不應州郡之命王莽以業為酒士病不之官遂隱藏山谷絕匿名迹終莽之世及公孫述僭號素聞業賢徵之欲以為博士業固疾不起數年述差不致之乃使其大鴻臚尹融持毒酒奉詔命以劫業若起則受公侯之位不起賜之以藥融譬旨勸之業乃歎曰危國不入亂國不居親於其身為不善者義所不從君子見危授命何乃誘以高位重餌哉融見業辭志不屈復曰宜呼室家計之業曰丈夫斷之於心久矣何妻子之為遂飲毒而死述聞大驚又恥有殺賢之名



乃遣使弔祠賻贈百匹業子輩逃辭不受蜀平  
光武下詔表其閭益部紀載其高節圖畫形象

益部尋圖象先褒李巨游讀書通大義立志冠清  
流憶自黃皇臘經今白帝秋井蛙分駭浪嵎虎拒  
巖幽譬旨鴻臚切徵官博士優里人榮使節山鳥  
避車騶篤論尊尼父清裁企仲由當追君子躅不  
與室家謀獨行長千古高眠自一邱聞孫多好學  
師古接媵修忽下弓旌召難爲澗壑留從容懷白  
刃決絕卻華輶介節誠無奪微言或可投風回猿  
岫敞霧卷鶴書收隱痛方童叟嚴親赴國仇尸饔  
常并日廢蓼擬填溝歲逐糟糠老雲遺富貴浮幸  
看兒息大敢有宦名求相對銜雙涕終身困百憂  
一聞稱史傳白露滿梧秋

和王山史寄來燕中對菊詩

雪滿河橋歸轡遲十行書札寄相思楚臣終是餐  
英客愁見燕臺落葉時

關中雜詩

文史生涯拙關河歲月勞幽情便水竹逸韻老蓬  
蒿獨雁飛常迅寒雞宿愈高一闕西華頂天下小  
秋豪

皇漢山樊久興唐洞壑餘空嗟衣劍滅但識水煙  
疏寥落三都賦棲遲萬卷書西京多健作儻有似

相如時寓富平朱文學樹  
滋齋中藏書甚多

宋王僧達和琅邪王依古詩隆周為藪澤皇漢成山樊梁江  
淹從建平王游紀南城詩年積衣劍滅漢書揚雄傳有薦雄

文似相  
如者

谷口耕畬少金門待詔多時情尊筆札吾道失弦  
歌夜月辭雞樹秋風下雀羅尚留園綺蹟終古重

山阿

漢書王貢兩龔鮑傳谷口鄭子真不詘其志耕於巖石之下名震于京師樓護傳與谷永俱為五侯上客長安號曰谷子雲筆札樓君卿唇舌三國志注引世語劉放孫資共典機任夏侯獻曹肇心內不平殿中有雞棲樹二人相謂曰此亦久矣其能復幾

徂謝良朋盡雕傷節士空延陵虛寶劍中散絕絲

桐名譽蓀蘭並文章日月同今宵開敝篋猶是舊

華風

與李生雲雲霓女第亡友遺詩

史記屈原傳推此志也雖與日月爭光可也

緬憶梁鴻隱孤高閱歲華門西吳會郭橋下伯通

家異地情相似前期道每賒請從關尹住不必向

流沙

山史新構小齋將延子住

過朝邑王處士建常

黃鵠山川意相隨萬里翔誰能三十載龜殼但支

牀

史記龜策傳南方老人用龜支牀足行二十餘歲老人死移牀龜尚尚生不死龜能行氣導引 唐王維詩鳩形將刻杖龜殼

牀用支

寄子嚴

弟紆字屠維協洽

二紀違脊令撫心悲如何惟爾幼孤癸十畝安江  
沈不幸喪厥明猶能保天和今年已六十與吾亦  
肩差里人推祭酒品行無譏訶昔年遣兒來省我  
桑乾河兒言家頗温歲得數困禾廚中列酒漿籬  
下羣雞鵝常時比鄰窵農談一相過亦有賦役憂  
未妨藝桑麻頃報得兩孫青蔥滿庭柯媿我半生  
來飄泊隨干戈偶至渭水濱垂釣臨洪波春雲開  
三峰秀出千丈荷行止雖聽天懷土情則那反躬  
計所獲孰與吾仲多顧此莫年心尙未甘蹉跎寄

爾詩一篇當使兒子歌

寄次耕時被薦在燕中

昨接尺素書言近在吳興洗耳茗水濱扣舷歌采  
菱何圖志不遂策蹇還就徵辛苦路三千裹糧復  
羸勝夜驅燕市月曉踏盧溝冰京雒多文人一貫  
同淄澠分題賦淫麗角句爭飛騰關西有二士立  
志粗可稱雖赴翹車招猶知畏友朋儻及雨露濡  
相將上諸陵定有南冠思悲哉不可勝轉盼復秋  
風當隨張季鷹歸詠白華詩膳羞與晨增嗟我性  
難馴窮老彌剛稜孤蹟似鴻冥心尚防弋矰或有  
金馬客問余可共登爲言顧彥先惟辦刀與繩

郭璞江賦詠采菱以扣舷 楊子法言辭人之賦麗以淫 晉書顧榮傳與州里楊彥明書曰吾爲齊王主簿恆慮禍及見刀

與繩每欲自殺



次耕書來言時貴有求觀余所著書者荅示  
年來行止類浮萍雖有留書未殺青世事粗諳身  
已老古音方奏客誰聽兒從死父傳楹語帝遣生  
徒受壁經投筆斯然成一笑春風綠草滿階庭

晏子春秋晏子病將死鑿楹納書焉謂其妻曰楹語也子壯而示之梁吳均邊城將詩留書應鑿楹傳功須勒社

### 雲臺觀尋希夷先生遺蹟

舊是唐朝士身更五代餘每懷淳古意聊卜華山  
居月落巖阿寂雲來洞口虛果哉非荷蕢獨識太  
平初

畫墁錄希夷先生陳搏後唐長興中進士也既而棄科舉之武當山又止房陵年七十餘至華山葺雲臺廢觀居之

硤石驛東二十里有西鷗路繇趙保白楊樹  
二百五十里至臨汝以譏察之嚴築垣封閉

過此有題



行人愁向汝州來前月西鷗禁不開弔古莫言秦  
法峻雞鳴曾放孟嘗回

雒陽

澗水成周宅邛山漢代京三川通地絡鶉火叶星  
精文軌同王朔蒐畋會卜征東門迎九鼎北闕望  
璣衡象魏雲常紫龍池水自清尊師延國老聽講  
集諸生金谷荒煙合銅駝蔓草縈曲多羌笛韻縣  
有陸渾名鶴望將焉屬鯨吞未息爭詎忘修禮樂  
何計偃戈兵赤伏看猶在蒼鵝起莫驚停驂觀雒  
汭微禹動深情

後漢書隗囂傳斷截地絡郡國志雒陽東城門名鼎門帝王  
世紀曰九鼎所從入雒陽伽藍記次北曰閭闔門漢曰上西

門上有銅璇璣玉衡以齊七政東京賦建象魏之兩觀雒陽  
伽藍記九龍殿前有九龍吐水成一海左傳僖二十二年秦

晉遷陸渾之戎于伊川注允姓之戎居陸渾在秦晉西北二國  
誘而徙之伊川遂從戎號至今為陸渾縣也三國志張飛傳

思漢之士  
延頸鶴望

三月十九日行次嵩山會善寺

獨抱遺弓望玉京  
白頭荒野淚霑纓  
霜姿尙似嵩山柏  
舊日聞呼萬歲聲

少林寺

峩峩五乳峰  
弈弈少林寺  
海內昔橫流  
立功自隋季  
弘構類宸居  
天衣照金織  
清梵切雲霄  
禪鐙晃蒼翠  
頗聞經律餘  
多亦諳武藝  
疆場有艱虞  
遣之扞王事  
今者何寂寥  
闐矣成蕪蕪  
壞壁出游蜂  
空庭雖荒雉  
荅言新令嚴  
括田任汚吏  
增科及寺莊  
不問前朝賜  
山僧闕餼粥  
住守無一二  
百物有盛衰  
回旋儻天意  
豈無材傑人  
發憤起積廢  
寄語惠

場流勉待秦王至

唐武德四年太宗以陝東道行臺雍州牧秦王率諸軍攻王世充寺僧惠場曇宗等

執世无姪仁則來歸賜  
地四十頃水碾一具

### 嵩山

位宅中央正高疑上界鄰蓄波含潁汝吐氣接星  
辰二室雲長擁三呼響自臻淳風傳至德孤隱秘  
靈真世敝將還古人愁願質神石開重出啓嶽降  
再生申老柏搖新翠幽花茁晚春豈知巢許窟多  
有濟時人

白虎通中央之嶽獨加高者何中央居四方之中可高故曰嵩  
高山 唐李吉甫嵩陽觀頌抱汝含潁風交雨會 後漢書文

苑傳多上響臻 中  
庸質諸鬼神而無疑

### 測景臺

在登封縣東南三  
十里故告成縣

象器先王作靈臺太室東陰陽求日至風雨會天  
中考極三辰正封畿萬國同吾衰今已甚猶一夢  
周公

卓太傅祠

在密縣東三十里大魏鎮

拱木環遺寢空山走部民循良思舊德執節表淳臣几杖中興禮丹青御座親至今傳俎豆長接大魏春

後漢書卓茂傳光武詔曰前密令卓茂東身自修執節淳固今以茂為太傅封褒德侯食邑二千戶賜几杖車馬衣一襲絮五百斤朱祐傳永平中圖畫二十八將于南宮雲臺其外又有王常李通竇融卓茂共三十二人

梁園

梁園詞賦想遺音雕績風流遂至今縱使鄒枚仍接踵不過貪得孝王金

海上

海上雪深時長空無一雁平生李少卿持酒來相勸

五嶽

五嶽何時徧行游二十春誰知禽子夏昔是去官人

漢書王貢兩龔鮑傳北海禽慶子夏儒生去官不仕於莽

### 贈張力臣

張君二徐流篆分特精妙獨坐淮水濱臨池伴魚  
釣京口躡寒蕪彭城舉荒藿扁舟浮漢江一攬關  
山要西上定軍山咨嗟武侯廟旋車下秦棧絕谷  
隨奔峭昭陵圖駿骨漢闕悲殘照石鼓在燕山望  
諸可憑弔還登尼父堂禮器存遺詔囊中金石文  
一室供長嘯諸子竝多材筆畫皆克肖削拊追宜  
官俗書嗤逸少尤工蒼雅學深鄙庸儒剽卻思舊  
游國轉瞬分疆徼古堠出夕烽平林延野燒惟此  
數卷書鳴琴對言笑持以勸兒曹四海有同調莫



# 浪逐王孫但從諸母漂

蜀志諸葛亮傳葬漢中定軍山景耀六年詔為立廟 集古錄有後漢修孔子廟禮器碑 晉衛恆書勢師宜官甚矜其能或

時不持錢詣酒家飲因書其壁雇觀者以讎酒討錢足而滅之每書輒削而焚其附梁鶴乃益為版而飲之酒候其醉而竊其

附 韓退之石鼓歌 羲之俗書趁姿媚

## 子德自燕中西歸省我於汾州天寧寺

一載燕臺別頻承注問書天空烏鳥去秋到雁行  
初共識斑衣重偏憐阜帽疏輕身騎款段一徑訪  
樵漁

### 寄次耕

入雒乘軒車中宵心有愠儻呼黃耳來更得遼東  
問

易夬九三 若濡有愠

六鼇成簸蕩夜宿看星河相對愁珠桂流民輦下

多

嘗披秋興篇欲作東皋計聞有二毛人年纔三十

二

歲莫西還時李生雲霑方讀鹽鐵論

積雪凍關河我行復千里忽聞弦誦聲遠出衡門  
裏在漢方盛時言利弘羊始桓生書一編恢卓有  
深旨發憤刺公卿嗜利無廉恥片言折斗筭篤論  
垂青史矧乃衰亂仍征斂橫無紀轉餉七盤山骨  
滿秦川底太息問朝紳食粟斯已矣幸哉荀卿門  
尚有苞邱子

鹽鐵論引春秋曰其政恢卓恢卓可以為卿相其政察察察察  
可以為匹夫又曰李斯與苞邱子俱事荀卿苞邱子飯蕨蓬  
藜道於白屋之下

送康文學乃心歸邵陽

上章  
涪灘

子夏看書室臨河四望開山從雷首去浪拂禹門  
迴大道疑將廢遺經重可哀非君真好古誰為掃  
莓苔

水經注徐水東南逕子夏陵北東入河又  
曰東南北有二石室臨側河崖名子夏室

友人來坐中口占二絕

不材聊得保天年便可長棲一壑邊寄語故人多  
自愛但辭青紫即神仙  
昨過河東望首陽空山煙靄尚蒼蒼傳聞高士燕  
中返料理牀頭阜莢囊

隋書五行志梁末童謠云  
黃塵汚人衣阜莢相料理

送李生南歸寄戴笠王錫闡二高士

華山五粒松寄向江東去白雲滿江天高士今何  
處憶昔過湖濱行吟兩故人潛龍猶在水別鶴已

來秦江海多翻覆林泉異棲宿驚聞東市琴涕隕  
堂前筑去去逐征蓬隨風西復東風吹蘭蕙色一  
夜落關中五陵生蔓草愁絕咸陽道平生四海心  
竟作終南老送子出函關南山望北山洞庭多桂  
樹折取一枝還

訓族子湄

二紀心如昨詩來覺道同微禽難入海寒木久生  
風谷口青門外沙頭白蜺東不知耆舊里何處有  
龐公

郭璞游仙詩淮海變微禽吾生獨不化  
江在蘇州東南二十里一江東南上七十里白蜺湖  
史記正義三

朱處士鶴齡寄尚書埤傳

昔我適濟南曾過伏生祠青山對虛楹零露寒高  
枝精靈竟何往再拜空階墀迫怵秦火焚豈竟逢

漢時此書立博士天下亦一治嗟彼九十翁俟河  
未爲遲不厭文字譌百王賴著龜後人失其傳巧  
文患多師忽見吾友書一編遠來貽緬想江上邨  
弦歌類齊淄白首窮六經夢寐親臯伊百家紛綸  
說爬羅殆無遺論及禹貢篇九州若列眉上愁法  
令煩下慨淳風衰君今未大耋正可持網維煙艇  
隔吳門臨風苦相思爲招陽鳥來寄此懷人辭

哭李侍御灌谿先生模

故國悲遺老南邦憶羽儀巡方先帝日射策德陵  
時落照辭烏府秋風散赤墀

君以崇禎十四年左遷南  
京國子監典籍南渡復官

稱病  
不出

行年逾八十當世歷興衰廉里居龔勝繇山

隱介推清操侔白璧直道叶朱絲函丈天涯遠杓  
衡歲序移無絲承問訊祇益歎差池水沒延州宅



山積伍相祠傳家惟疏草累德有銘碑灑涕瞻鄉  
社論心切舊知空餘歲寒誼不敢負交期

漢書龔勝傳勝居彭城廉里周禮大祝作六  
辭六曰誄注誄謂積累生時德行以賜之命

### 華下有懷顧推官

秋風動喬嶽黃葉辭中林策杖且行游息此空亭  
陰伊昔吾宗英賦詩一登臨爾來閱三紀斯人成  
古今邈矣越石嘯悲哉愁生琴鐘呂久不鳴乾坤  
盡聾喑爲我呼蓐收虎爪持霜金起我九原豪獮  
彼田中禽下見采薇子舊盟猶可尋神理儻不睽  
久要終此心

晉語號公夢在廟有神人面目毛虎爪執鉞立於西河召史翼  
占之對曰如君之言則蓐收也天之刑神也 易師六五田有  
禽利 執言

### 華陰古蹟二首

平舒道

何處平舒道西風卷夕雲空留一片璧為遺瀉池君

回谿

回谿非故隘九虎失西東惟有黃金匱依然又省中

悼亡

獨坐寒窗望臺砧宜言偕老記初心誰知游子天涯別一任閨蕪日夜深

江淹悼亡詩窗塵生歲時阻閨蕪日夜深

北府曾縫戰士衣酒漿賓從各無違虛堂一夕琴先斷華表千年鶴未歸廿年作客向邊陲坐歎蘭枯柳亦衰傳說故園荆

棘長此生能得首邱時

貞姑馬鬣在江邨送汝黃泉六歲孫地下相煩告  
公姥遺民猶有一人存

摩天黃鵠自常飢但惜流光不可追他日樂羊來  
舊里何人更與斷機絲

冬至寓汾州之陽城里中尉敏浮家祭畢而  
飲有作

歲時常祭祀朝夕自饗飧尙是先人昨誰非故國  
恩枯畦殘宿雪凍樹出初暎奠醊求何所鄰家借  
小園

流離踰二紀愴悅歷三都墮甑煤還拾承槽酒旋  
沽荒庭依老檜空谷遺生芻白髮偕宗叟相看道  
不孤

呂氏春秋顏回對曰嚮者煤矣入甑中棄食不祥  
回攫而飯之  
劉伶酒德頌於是方奉饗承槽

珍傲宋版印

王孫猶自給一頃豆萁田今日還相飯千秋共爾  
憐青門餘地窄白社舊交偏傳與兒曹記無忘漢  
臘年

寄題貞孝墓後四梯

重光作噩

四梯先人種旁臨一畝池霜彫萱草色日映女貞  
枝舊業從飄蕩非材得慙遺清陰常不散勿使衆  
禽窺

爾雅翼梯有七絕一壽二多陰三無鳥巢四  
無蟲蠹五霜葉可玩六嘉實七落葉肥大

贈衛處士蒿

拘疾來河東息此澮水旁寒禽繞疏枝百卉霑微  
霜幸逢同方友典墳共相將逢萌既解冠范丹亦  
絕糧弦歌足自遣感慨論百王王叔遂頓首孝獻

封山陽一身殉社稷自古無先皇與君同歲生中  
年歷興亡衰遲數儔輩落落晨星行旅懷正鬱邑  
矧乃多病妨著書陳治本庶以回穹蒼遙遙千載  
心眷眷桑榆光

訓李子德二十四韻

戴雪來青鳥開雲見素書故人心不忘旅叟計何  
如上國嘗環轍浮家未卜居康成嗟耄矣尼父念  
歸與忽枉佳篇贈能令積思攄柴門晴旭下松徑  
谷風舒記昔方傾蓋相逢便執袂自言安款段何  
意辱干旃適楚懷陳軫游燕弔望諸詎驚新寵大  
肯與舊交疏不磷誠師孔知非已類蘧老當爲圃  
日業是下帷初達夜抽經笥行春奉板輿誅茅成  
土室闢地得新畬水躍穿冰鯉山榮向日蔬已衰

晚學問將隱悔名譽客舍輕彈鋏王門薄曳裾一  
身長瓠落四海竟淪胥契闊頭雙白蹉跎歲又除  
空山清澹曲喬木絳郊餘不出風威滅無營日景  
徐但看堯典續莫畏禹陰虛地闊分津版天長接  
草廬一從聽七發欲起命中車

贈毛錦銜

來時冬雁飛去日春風度浮雲戀故山翔鳥懷高  
樹一別遂西東各言難久駐去去慎所之長安有  
歧路

亭林詩集卷之五



俗流好鄭衛乾坤盡聾暗建安激餘波嗣宗有遺  
音痛自帝京淪戈甲滿江潯祖生奮擊楫精衛憐  
東沈仇讎在門戶山川恣搜尋浩然思中原賦詩  
一登臨諸陵何崔嵬萬木生秋陰再拜剪荆棘庶  
幾儻來歆時命乃大謬斧柯未能任發憤吐忠義  
斯人成古今不入時人選聊比國風吟守之俟來  
哲遙遙千載心

吳兒解作吳中曲斯文萬古將誰屬獨抱遺弓望  
玉京新詩歷落鳴寒玉新詩吟罷更徘徊瀧水孤  
雲萬壑哀禿筆悽文來漲海人寰尚有遺民在廿  
年作客向邊陲如見唐臣望哭時百拜丹心今未  
死天邊淚作長江水待誰更奮魯陽戈傷今弔古  
懷坎壈嗚呼蒲黃之輩何其多鵲來燕去自成窠

謹案顧亭林先生志行學業實五百年來一人餘  
事爲詩事必精當詞必典雅奄有唐宋諸大家之  
長集凡五卷見潘次耕前輩所刻亭林遺書中無  
專行本也湘陰吳君光堯假館修府有年篤行善  
屬文尤心儀先生之學暇時商榷擬重梓遺書而  
以詩集爲嚆矢因偕惠來陳君鳳翔長沙左君壽  
朋善化張君希詠精校付刊修府集先生句敬題  
五七言各一章並識其緣起如此光緒戊寅仲冬  
後學嘉定張修府跋於永州官舍